

28
(3)

卷121
673
部六:65



文獻通考卷第二百五十四



鄱陽馬端臨貴與著

帝系考五

后妃

南史后妃傳叙六宮位號前史代有不同晉武帝采漢魏之制置貴嬪夫人貴人是為三夫人位視三公淑妃淑媛淑儀修華修容修儀婕妤好容華克華是為九嬪位視九卿其餘有美人才人中才人爵視千石以下宋武帝省一才人其餘仍用晉制按貴嬪魏文帝所制夫人魏武帝初建魏國所制貴人漢光武所制淑妃魏明帝

所制淑媛魏文帝所制淑儀修華晉武帝所制修容魏武帝所制修儀魏明帝所制婕妤容華前漢舊號充華晉武帝所制美人漢光武所制及孝武孝建三年省夫人置貴妃位比相國進貴嬪比丞相貴人比三司以爲三夫人又置昭儀昭容昭華以代修華修儀修容又置中才人充衣以爲散位按昭儀漢元帝所制昭容孝武所制昭華魏明帝所制中才人晉武帝所制充衣前漢舊制及明帝泰始二年省淑妃昭華中才人充衣復置修華修儀修容才人良人三年又省貴人置貴姬以備三夫人之數又置昭華增淑容承徽列榮以淑媛淑儀

淑容昭華昭儀昭容修華修儀修容爲九嬪婕妤容華充華承徽列榮凡五職亞九嬪美人才人良人三職爲散役其後帝留心後房擬百官備置內職焉及齊高帝建元元年有司奏置貴嬪夫人貴人爲三夫人修華修儀修容淑妃淑媛淑儀婕妤容華充華爲九嬪美人中才人才人爲散職三年太子宫置三內職良娣比開國侯寶林比五等侯才人比駙馬都尉及永明元年有司奏貴妃淑妃並加金章紫綬佩于闔玉淑妃舊擬九嬪以淑爲溫恭之稱妃爲亞后之名進同貴妃以比三司夫人之號不殊蕃國降淑媛以比九卿七年復置昭容

位在九嬪焉梁武撥亂反正深鑒奢逸配德早終長秋
曠位定令制貴妃貴嬪貴姬爲三夫人淑媛淑儀淑容
昭華昭儀昭容修華修儀修容爲九嬪婕妤容華充華
承徽列榮爲五職美人才人良人爲三職東宮置良娣
寶林爲二職及簡文元帝出自儲蕃或迫在拘繫或逼
於寇亂且妃竝先歿更不建椒闈陳武光膺天歷以朴
素自居故後宮員位其數多闕文帝天嘉之後詔宮職
備員其所置立無改梁舊編之令文以爲後法然帝性
恭儉而嬪嬙不備宣帝後主無所改作今總綴緝以立
此篇云

宋孝懿蕭皇后名文壽蘭陵人武帝繼母帝爲宋公宋
王加太妃太后受禪尊爲皇太后

武敬臧皇后名愛親東莞人適武帝義熙四年歿追贈
豫章郡夫人武帝崩祔葬初寧陵

武帝張夫人不知何許人生少帝帝卽位尊爲皇太后
少帝廢太后還璽紱隨居吳縣文帝元嘉初拜營陽國
太妃二年薨

文帝胡太后名道女淮南人義熙初武帝納之生文帝
五年被譴死武帝卽位追贈婕妤文帝卽位上尊號曰
章皇太后陵曰熙寧

少帝司馬皇后名茂英晉恭帝女宋初拜皇太子妃少
帝卽位爲皇后元嘉初降爲榮陽王妃十六年薨
文元袁皇后名齊嬀陳郡陽夏人父湛少適文帝爲王
妃生子劭元嘉十七年崩

潘淑妃以色進生子濬後爲元凶劭所殺

孝武昭路太后名惠男丹陽建康人以貌入後宮生孝
武拜淑媛隨孝武出蕃孝武卽位尊爲太后

明宣沈太后名容姬爲文帝美人生明帝拜婕妤元嘉
三十年卒孝武卽位追贈太后

孝武文穆王皇后名憲嫺琅邪臨沂人初爲武陵王妃

生廢帝孝武卽位立爲皇后廢帝卽位尊爲皇太后
殷淑儀南郡王義宣女義宣敗帝密取之假姓殷薨追
贈貴妃或云貴妃是殷琰家人入義宣家義宣敗入宮
云

前廢帝何皇后名令婉廬江瀟人父瑀初爲皇太子妃
薨於東宮廢帝卽位追諡曰獻皇后

明恭王皇后名貞風琅邪臨沂人初爲湘東王妃明帝
卽位立爲后廢帝卽位尊爲太后

後廢帝陳太妃名妙登丹陽建康屠家女孝武宮人以
賜明帝生後廢帝拜貴妃廢帝卽位尊爲皇太妃

後廢帝江皇后名簡珪濟南南陽考城人初納爲太子妃
帝卽位爲皇后帝旣廢降爲蒼梧王妃

順帝陳太妃明帝宮人爲昭華明帝以桂陽王休範子
令妃養之卽位爲順帝進爲皇太妃

順帝謝皇后名梵境陳郡陽夏人父賜順帝立爲皇后
帝禪位降爲汝陽王妃

齊武穆裴皇后名惠昭河東聞喜人昇明三年爲齊世
子妃建元元年爲皇太子妃二年薨武帝卽位追尊爲
皇太后

文安王皇后名寶明琅邪臨沂人父暉之建元四年爲

皇太子妃鬱林王卽位尊爲皇太后稱宣德宮明帝卽
位出居鄱陽王故第梁武定建業迎入宮稱制和帝禪
位遜居外宮梁天監時薨

鬱林王何妃名婧英廬江潯人初爲南郡王妃太孫卽
位立爲皇后帝廢貶爲王妃

海陵王王妃名韶明琅邪臨沂人父慈初爲鬱林王妃
王卽位爲皇后王廢降爲妃

明敬劉皇后名惠端彭城人明帝納之永明七年卒帝
卽位贈皇后

東昏褚皇后名令璩河南陽翟人父澄建武初納爲皇

太子妃東昏卽位爲皇后東昏廢降爲庶人
和王皇后名舜華琅邪臨沂人儉之孫初爲隨王妃帝
卽位爲皇后旣禪位降爲妃

梁武德鄰皇后名徽高平金鄉人父暕齊建元末嬪於
武帝帝爲雍州刺史日殂卽位追贈皇后

武丁貴嬪名令光譙國人武帝鎮樊城納之生昭明太
子冊爲貴嬪普通七年薨

文宣阮太后名令羸會稽餘姚人武帝平建業納爲采
女生元帝爲修容隨出蕃大同六年薨元帝卽位追崇
爲太后

簡文王皇后名靈賓琅邪臨沂人初爲晉安王妃大通
三年拜皇太子妃薨簡文卽位追崇爲皇后

元帝徐妃名昭佩東海郟人天監十六年拜爲湘東王
妃太清三年以罪死

敬夏太后會稽人元帝納之生敬宗昭泰元年尊爲太
后明年降爲江陰國太妃

敬王皇后琅邪臨沂人初爲晉安王妃王卽位拜皇后
禪位降爲江陰王妃

陳武宣章皇后名要兒吳興烏程人武帝聘之受禪立
爲皇后文帝卽位尊爲皇太后

文沈皇后名妙容吳興武康人梁大同中歸於文帝武帝卽位爲臨川王妃文帝卽位爲皇后廢帝立爲皇太后

廢帝王皇后琅邪臨沂人初爲皇太子妃廢帝卽位立爲皇后帝廢降爲臨海王妃至德中薨

宣柳皇后名敬言河東解縣人宣帝在江陵聘之生後主宣帝卽位爲皇后後主卽位尊爲皇太后

後主沈皇后名婺華吳興武康人父君理太建三年拜爲皇太子妃後主卽位立爲皇后陳亡入長安隋煬帝每巡幸恒令從駕煬帝被弑后爲尼於毗陵天靜寺貞

觀初卒

張貴妃名麗華本兵家女後主爲太子選入宮得幸生太子深拜貴妃陳亡爲隋軍所殺

北史后妃傳叙魏氏王業之兆雖始於神元然自昭成之前未具言六宮之典而章平思昭穆惠煬烈八帝妃后無聞道武追尊祖妣皆從帝謚爲皇后始立中宮餘妾或稱夫人多少無限然皆有品次太武稍增左右昭儀及貴人椒房等後庭漸已多矣又魏故事將立皇后必令手鑄金人以成者爲吉不則不得立也又太武文成保母劬渠之恩並極尊崇之義雖事乖典禮而觀過

知仁孝文改定內官左右昭儀位視大司馬三夫人視三公三嬪視三卿六嬪視六卿世婦視中大夫御女視元士後置女職以典內司視尙書令僕作司大監女侍中三官視二品監女尙書美人女史女賢人女書史書女小書女五官視三品中才人供人中使女生才人恭使宮人視四品青衣女酒女饗女食奚官女奴視五品及齊神武文襄俱未踐尊極神武嫡妻稱妃其所聘孀孀女稱爲孀孀公主文襄旣尙魏朝公主故無別號兩宮白餘姬侍並稱娘而已文宣後庭雖有夫人嬪御之稱然未具員數孝昭內職甚少唯楊妃才貌兼美復是

貴家襄城王母桑氏有德行並蒙恩禮其餘無聞焉河清新令內命婦依古制有三夫人九嬪二十七世婦八十一御女又準漢制置昭儀有左右二人比丞相其弘德正德崇德爲三夫人比三公光猷昭訓隆徽爲上嬪比三卿宣徽凝暉宣明順華凝華光訓爲下嬪比六卿正華令則修訓曜儀明淑芳華敬婉昭華光正昭寧貞範宏徽和德弘猷茂光明信靜訓曜德廣訓暉範敬訓芳猷婉華明範艷儀暉則敬爲二十七世婦比從三品穆光茂德貞懿曜光貞凝光範令儀內範穆閨婉德明婉艷婉妙範暉章敬茂靜肅章穆華慎儀妙儀明懿崇

明麗則婉儀彭修閑修靜弘慎艷光漪容徽淑秀儀芳
婉貞慎明艷穆修範肅容茂儀英淑弘艷正信凝婉英
範懷順修媛良則瑤章訓成潤儀寧訓淑懿柔則穆儀
修禮昭慎貞媛肅閨敬順柔華昭順敬寧明訓弘儀崇
敬修敬承閑昭容麗儀閑華思柔媛光懷德良媛淑猗
茂範良信艷華徽娥肅儀妙則爲八十一御女比正四
品武成好內並具其員自外又置才人采女以爲散號
後主旣立二后昭儀以下皆倍其數又置左右娥英比
左右丞相降昭儀比二夫人尋又置淑妃一人比相國
周氏率由姬制內職有序文帝創基修衽席以儉約武

皇嗣歷節情欲於矯枉宮闈有貫魚之美戚里無私溺
之尤可謂得君人之體也宣皇外行其志內逞其欲溪
壑難滿采擇無厭恩之所加莫限廝皂榮之所及無隔
險諛於是升蘭殿以正位踐椒庭而齊體者非一人焉
階房帷而拖青紫緣恩幸而擁玉帛非一族焉雖辛癸
之荒淫趙李之傾惑曾未足比其髣髴也人厭苛政弊
事實多文帝之祀忽諸特由於此隋文思革前弊大矯
其失惟皇后當室傍無私寵婦官位號未詳備焉開皇
二年著內官之式略依周禮省減其數嬪三員掌教四
德視正三品世婦九員掌賓客祭祀視正五品女御三

十八員掌女功絲枲視正七品又采漢晉舊儀置六尙
六司六典遞相統攝以掌宮掖之政一曰尙書掌導引
皇后及閨閣稟賜管司令三人掌圖籍法式糾察宣奏
典琮三人掌琮璽器玩二曰尙儀掌禮儀教學管司樂
三人掌音律之事典贊三人掌導引內外命婦朝見三
曰尙服掌服章寶藏管司飾三人掌簪珥花嚴典櫛三
人掌巾櫛膏沐四曰尙食掌進膳先嘗管司醫三人掌
方藥卜筮典器三人掌樽彝器皿五曰尙寢掌帷帳牀
褥管司筵三人掌鋪設洒掃典執三人掌扇傘燈燭六
曰尙工掌營造百役管司製三人掌衣服裁縫典會三

人掌財帛出入六尙各三員視從九品六司視勲品六
典視流外二品初文獻皇后功參歷試外預朝政內擅
宮闈懷嫉妬之心虛嬪妾之位不設三妃防其上逼自
嬪以下置六十員又加抑損服章降其品秩至文獻崩
後始置貴人三員增嬪至九員世婦二十七員御女八
十一員貴人等關掌宮闈之務六尙以下皆分隸焉煬
帝時后妃嬪御無釐婦職唯端麗飾陪從宴遊而已帝
又參詳典故自制嘉名著之於令貴妃淑妃德妃是爲
三夫人品正第一順儀順容順華修儀修容修華充儀
充容充華是爲九嬪品正第二婕妤一十二員品正第

三美人才人一十五員品正第四是爲世婦寶林二十四員品正第五御女二十四員品正第六采女三十七員品正第七是爲女御總一百二十以叙於燕寢又有承衣刀人皆趨侍左右並無員數視六品以下時又增置女官準尙書省以六局管二十四司一曰尙宮局管司言掌宣傳奏啓司簿掌名錄計度司正掌格式推罰司闈掌門閤管籥二曰尙儀局管司籍掌經史教學紙筆几案司樂掌音律司賓掌賓客司贊掌禮儀贊相導引三曰尙服局管司璽掌琮璽符節司衣掌衣服司飾掌湯沐巾櫛玩弄司仗掌仗衛戎器四曰尙食局管司

膳掌膳羞司醢掌酒醴醢醢司藥掌醫巫藥劑司膳掌廩餼柴炭五曰尙寢局管司設掌牀席帳帷鋪設洒掃司輿掌輿輦傘扇執持羽儀司苑掌園籓種植蔬菜瓜果司燈掌火燭六曰尙工局管司製掌營造裁縫司寶掌金玉珠璣錢貨司絲掌繒帛司織掌織染六尙二十二司員各二人唯司樂司膳員各四人每司又置典及掌以貳其職六尙十人品從第五司二十八人品從第六典二十八人品從第七掌二十八人品從第九女使流外量局閑劇多者十人以下無定員數聯事分職各有司存焉

魏獻明皇后賀氏東部大人野干女生道武皇始元年崩後追加尊號

道武皇后慕容氏寶之季女中山平入宮得幸後立爲皇后

道武宣穆皇后劉氏劉眷女登國初納爲夫人生明元以鑄金人不成故不登后位魏故事後宮產子將爲儲貳其母皆賜死道武末年后以舊法崩明元卽位追尊位

明元昭哀皇后姚氏姚興女明元納爲夫人後薨追贈后

明元密皇后杜氏魏郡鄴人以良家子選入太子宫生

太武拜貴嬪薨太武卽位追尊爲后

太武保母竇氏初以夫家坐事誅入宮明元命爲太武保母太武卽位尊爲皇太后

太武皇后赫連氏屈丐女太武平統萬納之爲貴人後立爲皇后文成初崩

太武景哀皇后賀氏代人初爲夫人生景穆薨追贈貴嬪

景穆恭皇后郁久閭氏河東王毗之妹以選入東宮生文成薨文成卽位追上尊號

文成乳母常氏本遼西人因事入宮乳文成帝卽位尊爲皇太后

文成文明皇后馮氏長樂信都人父朗坐事誅后遂入宮以選爲貴人後立爲皇后獻文卽位尊爲皇太后

文成元皇后李氏梁國蒙縣人太武南征得之後入文成宮中生獻文拜貴人後諡元皇后

獻文思皇后李氏中山安喜人以選入宮爲夫人生孝文後追諡

孝文貞皇后林氏平涼人父勝坐法誅遂入掖庭生皇子恂薨追諡后

孝文廢后馮氏太師熙之女太和十七年立爲后後以寵衰廢爲尼

孝文幽皇后馮氏亦熙之女入宮拜昭儀後立爲皇后坐淫恣廢死葬以后禮

孝文文昭皇后高氏司徒公肇之妹以選入宮生宣武葬諡貴人宣武卽位追上尊號

宣武順皇后于氏太尉烈弟勁之女選入宮爲貴人帝卽位立爲后崩

宣武皇后高氏文昭皇后弟優之女入宮爲貴嬪帝卽位立爲后明帝卽位尊爲皇太后

宣武靈皇后胡氏安定臨涇人司徒國珍女入掖庭爲
允華生明帝帝卽位尊皇太妃後又尊爲皇太后

孝明皇后胡氏靈太后從兄盛之女帝卽位立爲皇后
武泰初入道爲尼

孝武皇后高氏齊神武長女帝立納爲后帝西幸關中
降爲彭成王妃

文帝文皇后乙弗氏河南洛陽人其先世吐谷渾渠帥
父瑗文帝納爲妃卽位冊爲皇后後帝結昏蠕蠕后遜
居別宮爲尼卒以嫌賜自盡

文帝悼皇后郁久閭氏蠕蠕主阿那瓌之長女蠕蠕屢

犯邊帝乃納其女爲后二年崩

少帝皇后宇文氏周文帝女帝爲太子納爲妃卽位爲

皇后帝旣廢崩后亦以忠於魏室罹禍

恭帝皇后若十氏司空長樂正公惠之女恭帝納之爲
后後出家爲尼

孝靜皇后高氏齊神武第二女天平四年聘爲皇后齊
受禪降爲中山王妃後再嫁於楊愔

齊武明皇后婁氏名昭君贈司徒內干之女神武聘之
旣秉政封渤海王拜爲王妃凡孕六男二女文宣受禪
尊爲皇太后

蠕蠕公主蠕蠕主郁久閭阿那瓌之女神武以蠕蠕屢犯邊聘其女神武崩文襄從其國法蒸焉產一女

彭城太妃爾朱氏榮之女魏孝莊后神武納爲別室生子洧後爲尼天保初爲太妃爲文宣所殺

馮翊太妃鄭氏名大車初爲魏廣平王妃神武納之生馮翊王潤

文襄敬皇后元氏魏靜帝之姊初爲世子妃文宣受禪尊爲文襄皇后居靜德宮武平中崩

文宣皇后李氏名祖娥趙郡李希宗女爲文宣妃帝受禪立爲皇后孝昭卽位號昭信皇后武成卽位逼淫之

遂爲尼齊亡入周隋時卒

北齊皇帝納后之禮納采問名納徵訖告園丘方澤及廟是日皇帝臨軒命太尉爲使司徒副之持節詣后行宮東向奉壘綬以冊授中常侍皇后受冊於行殿使者與公卿以下皆拜有司備迎禮太尉太保受詔而行主人公服迎拜於門使者入升自賓階東面主人升自阼階西面禮物陳於庭設席於兩楹間童子以壘書版升主人升跪受送者拜於大門外有司先於昭陽殿兩楹間供帳爲同牢之具皇后服大嚴繡衣帶綬佩加幪女長御引出升畫輪四望車女侍

中負璽陪乘鹵簿如大駕皇帝服袞冕出升御座皇后入門大鹵簿位門外小鹵簿入到東上閣施步障降車席道以入昭陽殿前至席位姆去幪皇后先拜後起皇帝後拜先起升自西階詣同牢座與皇后俱坐各三飲訖又各酌二爵一盃奏禮畢后與南向立皇帝御太極殿王公以下拜表謝又明日以榛栗棗脩見皇太后於昭陽殿擇日羣官上禮又擇日謁廟皇帝使太尉先以太牢告而後遍見羣廟

孝昭皇后元氏開府元蠻女初爲常山王妃孝昭卽位立爲皇后武成立降居順成宮齊亡入周隋時卒

弘德夫人李氏趙郡李叔讓女初爲魏靜帝嬪武成納之生南陽王仁爲太妃

武成皇后胡氏安定胡延之女生後主武成立爲皇后後主立尊爲皇太后

後主皇后斛律氏左丞相光之女初爲皇太子妃後主受禪立爲皇后光被害后廢後爲尼齊亡再適開府元仁

北齊皇太子納妃禮皇帝遣使納采有司備禮物會畢使者受詔而行主人迎於大門外禮畢會於廳事其次問名納吉並如納采納徵則使司徒及尙書令

爲使備禮物而行請期則以太常宗正卿爲使如納采親迎則太尉爲使三日妃朝皇帝於昭陽殿又朝皇后於宣光殿擇日羣臣上禮他日妃還又他日皇太子拜閣皇太子及王聘禮納采問名納吉請期親迎皆用羔羊一口鴈一隻酒黍稷米麵各一斛納徵用元三匹纁二匹束帛十匹大璋一虎皮二錦綵六十匹絹二百匹羔羊一口羊四口犢二頭酒黍稷稻米麵各十斛從車貳乘

後主皇后胡氏隴西王長仁女入宮爲昭儀斛律后廢立爲皇后後以忤胡太后廢爲尼齊亡後亦改嫁

後主穆皇后名邢利本斛律氏從婢入宮得幸生皇子恒胡皇后廢立爲后齊亡不知所終
馮淑妃名小憐穆后從婢穆后愛衰妃有寵封淑妃齊亡入周以賜代王達

周文宣叱奴皇后代人周文帝爲丞相納之生武帝帝卽位尊爲皇太后

孝閔皇后元氏名胡摩魏文帝女爲略陽公尙焉及踐祚立爲皇后帝被廢后爲尼晉公護誅上尊號爲孝閔皇后居崇義宮隋革命出居里第大業時卒

明敬皇后獨孤氏太保衛公信長女帝在藩納爲夫人

卽位立爲皇后崩與帝合葬昭陵

武成皇后阿史那氏突厥可汗女武帝時突厥強故聘其女爲后宣帝卽位尊爲皇太后

武皇后李氏名娥姿楚人江陵平沒入宮周文以賜武帝得幸生宣帝宣政元年尊爲皇太后

宣皇后楊氏名麗華隋文帝長女帝爲太子納爲妃卽位立爲后靜帝卽位爲皇太后

宣帝后朱氏名滿月吳人其家坐事沒入東宮宣帝幸之生靜帝立爲天元皇后

宣帝后陳氏潁川人以選入宮拜德妃立爲天左皇后

帝崩出俗爲尼唐永徽初卒

宣帝皇后元氏名樂尙河南洛陽人開府晟之女入宮爲貴妃後立爲天右皇后帝崩出俗爲尼貞觀中卒

宣帝皇后尉遲氏名繁熾蜀公迥之孫女初適杞公亮子溫以宗婦入廟帝逼幸之亮謀逆誅遂入宮爲天右大皇后帝崩出俗爲尼開皇十五年卒

靜帝司馬皇后名令姬消難之女納爲后二年隋文以后父奔陳廢爲庶人後嫁爲隋司州刺史李丹妻

隋文獻皇后獨孤氏名伽羅河南洛陽人周大司馬衛公信之女文帝受禪立爲皇后仁壽二年崩年五十九

宣華夫人陳氏陳宣帝女陳亡入掖庭文獻后崩進位
爲貴人後拜宣華夫人煬帝時卒

容華夫人蔡氏丹陽人陳亡以選入宮拜爲貴人後加
號容華夫人煬帝時卒

煬帝愍皇后蕭氏梁明帝歸之女文帝聘爲晉王妃煬
帝卽位立爲皇后煬帝遇弒後沒於竇建德突厥可賀
敦隋義城公主使迎之入虜庭唐貞觀四年破突厥以
禮致之歸於京師賜宅於興道里二十一年殂詔以皇
后禮合葬於揚州煬帝陵

隋皇太子納妃禮皇帝臨軒使者受詔而行主人俟

於廟門使者執鴈主人迎拜於大門之東使者入升
自西階立於楹間南面納采訖仍行問名儀事畢主
人請致禮於從者禮有幣馬其次擇日納吉又擇日
以玉帛乘馬納徵又擇日告命又擇日命有司以特
牲告廟冊妃皇太子將親迎皇帝臨軒醮而誡曰往
迎爾相承我宗事勗帥以敬對曰謹奉詔旣命羽儀
而行主人几筵於門外西面拜皇帝太子答拜主人
揖皇太子先入主人升立於阼階西面皇太子升進
當房戶前北面跪奠鴈俛伏興拜降出妃父進西面
戒之母於西階上施衿結帨及門內施鞶申之出門

妃升輅乘以几姆加幃皇太子乃馭輪三周馭者代之皇太子出大門乘輅羽儀還宮鷄鳴夙興以妃朝奠筭音煩於皇帝皇帝撫之又奠筭於皇后皇后撫之席於戶牖間妃立於席西祭奠而出

唐舊制皇后之下有貴妃淑妃德妃賢妃各一人爲夫人正一品昭儀昭容昭媛修儀修容修媛充儀充容充媛各一人爲九嬪正二品婕妤九人正三品美人九人正四品才人九人正五品寶林二十七人正六品御女二十七人正七品綵女二十七人正八品以備周禮六宮之數其外又有尙官尙儀尙服尙食尙寢尙功分掌

宮中服御藥膳之事官正糾憇失彤史紀功書過龍朔二年改易官名置贊德二人正一品以代夫人宣儀四人正二品以代九嬪承門五人正四品以代美人承旨五人正五品以代才人衛仙六人正六品以代寶林供奉八人正七品以代御女持節二十人正八品以代綵女又置侍巾三十人正九品咸亨二年復舊高祖太宗除隋之亂政未下車而大放宮女正位配尊惟其舊德宮闈之職備員而已所謂刑于內以正乎外及高宗永徽之後政出宮中公卿大夫罔不憚服其取威也多山陵未畢而冢嗣再廢遂掘翦皇室改立宗社非一朝一

夕之故其所由來漸矣及中宗追王韋氏崇寵三思使以先朝故事尊誘之於是慶雲之瑞宣於朝廷桑女之歌布於天下防閑之道大壞逆亂之謀構矣卒以禍敗爲後王誠元宗卽位大加懲革內外有別家道正矣按杜氏通典內官有惠妃麗妃華妃正一品淑儀德儀賢儀婉儀芳儀六人正二品美人四人正三品才人七人正四品與正史所載率皆不同其名號亦有見於國史但不詳所出今疏之於後以示廣記

容齋洪氏隨筆曰自漢以來帝王妃妾之多唯漢靈帝吳歸命侯晉武帝宋蒼梧王齊東昏陳後主

晉武至於萬人唐世明皇爲盛白樂天長恨歌云後宮佳麗三千人杜子美劔器行云先帝侍女八千人蓋言其多也新唐史所叙謂開元天寶中宮嬪大率至四萬嗜其甚矣隋大業離宮徧天下所在皆置宮女故裴寂爲晉陽宮監以私侍高祖及高祖義師經過處悉罷之其多可想

吳氏能改齋漫錄曰忽看金輿向月陂宮人按著便相隨恰從中尉門前過當處教看卧鴨池王建宮詞也按唐著作佐郎崔令欽教坊云左右兩教坊右多善歌左多工舞外有水泊俗號月陂陂形

如偃月也故王建述此又言妓女入宜春院謂之內人亦曰前頭人常在上前頭也其家得在教坊謂之內人四季給米得幸者謂之十家故王建又宮詞云內人對御疊花牋內人唱好龜茲急內人相續報花開內人籠脫繫紅條內人恐要秋衣著內人爭乞洗兒錢

高祖太穆順聖皇后竇氏京兆平陵人父毅周上柱國歸於高祖隋大業時崩於涿郡年四十五高祖卽位追諡皇后

太宗文德順聖皇后長孫氏河南洛陽人父晟歸於太

宗帝卽位爲皇后貞觀十年崩年三十六

太宗賢妃徐惠湖州長城人帝聞其文名召爲才人永徽元年卒

高宗廢后王氏并州祁人初納爲晉王妃卽位立爲皇后永徽六年爲武才人所譖廢爲庶人後爲武氏所殺高宗則天順聖皇后武氏并州文水人父士護初爲太宗才人帝崩與嬪御皆爲尼高宗見而悅之召之宮中生四子譖廢王皇后遂立爲后稱天后高宗崩爲皇太后臨朝

中宗和思順聖皇后趙氏京兆長安人父瓌帝爲英王

聘爲妃後爲武氏所殺神龍初追諡后中宗崩韋庶人
既廢有司乃請以后祔定陵

中宗庶人韋氏京兆萬年人父元貞帝在東宮被選爲
妃嗣聖初立爲后後隨帝遷房陵帝復位復正中宮唐
隆元年弑帝臨淄王隆基討而誅之追廢爲庶人

尙官昭容名婉兒父儀得罪死没入掖庭武后時掌內
詔命中宗復位拜昭容後以韋氏黨爲臨淄王所誅

睿宗肅明順聖皇后劉氏帝在藩納爲妃卽位立爲皇
后帝降號皇嗣復爲妃後爲武后所殺景雲元年追諡
睿宗昭成順聖皇后竇氏父孝湛帝卽位爲德妃生元

宗與劉后俱爲武后所殺葬於宮中秘莫知帝崩並招
魂祔葬橋陵

初太常加諡曰大昭成或言法宜引聖真冠諡而曰
大昭成非也以單言配之應曰聖昭若睿成以復言
配之應曰大聖昭成聖直昭成又引太穆皇后始諡
穆及高祖崩合帝諡曰太穆追增太穆神皇后文德
皇后始諡文德及太宗崩合諡文德聖皇后又援范
曄著漢光烈等爲比太常謂曄以帝號標后諡是史
家記事體婦人非必與夫同也入廟稱后繫夫在朝
稱太繫子文母生號也文王既没諡也周公豈以夫

從婦乎漢法不可以爲據制曰可天寶八載制詔自
太穆而下六皇后並增上順聖二諡云

元宗皇后王氏同州下邳人梁冀州刺史所念裔孫帝
爲臨淄王聘爲妃卽位立爲皇后開元十二年以罪廢
爲庶人寶應初追復后號

元宗貞順皇后武氏父攸止幼入宮帝卽位得幸封惠
妃禮秩比皇后生壽王瑁薨贈皇后及諡

元宗元獻皇后楊氏父知慶帝在東宮爲良媛生肅宗
爲貴嬪肅宗卽位追諡皇后

元宗貴妃楊氏蒲州永樂人父元琰幼孤養叔父家始
爲壽王妃帝悅之乃令其丐爲女官號太真潛納之宮
中天寶初冊貴妃安祿山反上幸蜀陳元禮等誅楊國
忠賜妃死時年三十八

肅宗廢后庶人張氏鄧州向城人父去逸帝在東宮爲
良娣乾元初拜淑妃繼立爲皇后帝大漸后謀廢太子
李輔國等矯詔廢而殺之

肅宗章敬皇后吳氏濮州濮陽人父令珪坐事死故后
幼入掖庭元宗以賜帝幸之生代宗年十八薨代宗卽
位追尊爲后合葬建陵

代宗貞懿皇后獨孤氏父穎帝卽位冊貴妃生韓王迥

大歷十年薨追號爲皇后

代宗睿真皇后沈氏吳興人開元末以良家子入東宮太子以賜廣平王生德宗天寶亂賊囚后東都王入洛方北討而河南再爲史思明所陷遂失太后所在德宗立訪求不得建中初上皇太后尊號憲宗卽位詔以大行啓殯日爲后發哀內殿上太皇太后謚冊祔代宗廟德宗昭德皇后王氏本仕家子帝爲魯王時納爲嬪生順宗旣卽位冊號淑妃貞元三年冊爲后其年后崩德宗賢妃韋氏以戚里舊族爲良娣德宗貞元四年冊拜賢妃帝崩自表留奉崇陵園元和時薨

順宗莊憲皇后王氏琅琊人代宗時以良家選入宮爲才人順宗在藩以才人賜之生憲宗冊爲良娣憲宗內禪尊爲太上皇后

憲宗懿安皇后郭氏汾陽王子儀之孫父曖憲宗爲廣陵王聘以爲妃生穆宗元和元年進冊貴妃羣臣請立爲后帝以掖庭多嬖豔恐后得尊位鉗掣不得肆故終不立穆宗嗣位尊爲皇太后

憲宗孝明皇后鄭氏丹陽人初爲李錡侍人錡反誅入掖庭帝幸之生宣宗宣宗爲光王爲王太妃帝卽位尊爲皇太后

穆宗恭僖皇后王氏越州人本仕家子侍帝東宮生敬宗長慶時冊爲妃敬宗立尊爲皇太后

穆宗貞獻皇后蕭氏閩人穆宗爲建安王后得侍生文宗文宗立尊爲皇太后

穆宗宣懿皇后韋氏失其先世穆宗爲太子得侍生武宗長慶時冊爲妃武宗立妃已亡追冊爲皇太后

尚宮宋若昭興州清陽人世以儒聞父廷芳能辭章生五女皆警慧善屬文長若莘次若昭若倫若憲若荀莘昭文尤高皆不肯與寒鄉凡裔爲姻對貞元中昭義節度使李抱真表其才德德宗召入禁中試文章經史大

義悉留之宮中高其風操不以妾侍命之呼學士若莘卒若昭嗣拜尚宮歷憲穆敬三朝皆呼先生后妃與諸王率以師禮見昭寶歷初卒若憲代司秘書後以罪賜死

敬宗貴妃郭氏父義長慶時妃以容入太子宮太子卽位爲才人生晉王普進爲貴妃文宗時薨

武宗賢妃王氏邯鄲人失其世年十三入宮穆宗以賜穎王王嗣位進號才人帝崩才人亦自盡宣宗嘉之贈賢妃

宣宗元昭皇后鼂氏不詳其世少入邸見寵帝卽位爲

美人生懿宗大中時薨贈昭容懿宗立追尊爲皇太后
懿宗惠安皇后王氏亦失所來咸通中冊貴妃生晉王
七年薨後王卽位僖宗追尊爲皇太后

懿宗淑妃郭氏幼入鄆王邸卽位以爲美人進拜淑妃
黃巢之亂流落不知所終

懿宗恭憲皇后王氏其出至微咸通中得幸生壽王王
立是爲昭宗追號皇太后

昭宗皇后何氏梓州人系族不顯帝爲壽王納之卽位
號淑妃後冊爲皇后帝遇弑哀帝卽位尊爲皇太后後
卒爲朱全忠所害

文獻通考卷第二百五十四

乾隆十二年校刊

文獻通考卷二百五十四 帝系五

三

文獻通考卷第二百五十五

鄱陽馬端臨貴與著

帝系考六

后妃

唐開元禮

皇帝納后儀

告園丘

卜日告園丘方澤並如時巡告祭儀其祝文臨時撰

臨軒命使

將行納綵制命太尉為使者宗正卿為副使吏部承以

戒之

問名納徵納吉告期并奉迎並同使

前一日尚書舍奉御設幄座於

太極殿如常守官設羣官客使等諸應陪位者次於東西朝堂太樂令展官懸於殿庭設舉麾位於殿上一位於懸下鼓吹令設十二案乘黃令陳車輅尚輦奉御陳輿輦皆如元日之儀典儀設文官一品以下五品以上位於懸東六品以下於橫街南皆重行西面北上設武官一品以下五品以上位於懸西六品以下於橫街南當文官皆重行東面北上設朝集使位各分方於文武官當品之下設諸親位於四品五品之下

皇帝親在東異姓親在西

設蕃客位各分方於朝集使六品之南諸州使人分方

位於朝集使九品之後設典儀位於懸東北贊者二人在南少退俱西向設使者受命位於大橫街南道東副使又於其東少退俱北面奉禮設門外位於東西朝堂如元日儀其日諸衛勒所部列黃麾仗如常儀羣官依時刻集朝堂俱就位各服其服通事舍人引就朝堂前位侍中量時刻版請中嚴釵戟近仗入陳於殿庭太樂令帥工人就舞位協律郎入就舉麾位諸侍衛之官各服其器服符寶俱就閣奉迎典儀帥贊者先入就位通事舍人引羣官入就位又引使副入立於太極門外道東西面黃門侍郎引主節執幡節中書侍郎引制書案

立於左延明門內道北西面北上侍中版奏外辦皇帝服袞冕御輦以出曲直華蓋警蹕侍衛如常儀皇帝將出仗動出自西房卽御座南向符寶郎奉寶置於御座如常通事舍人引使主副入就位定典儀曰再拜贊者承傳羣官在位者皆再拜侍中前承制降詣使者東北西面稱有制使主副俱再拜侍中宣制曰納某官女爲皇后命公等持節行納綵等禮宣訖使主副又再拜侍中還侍位黃門侍郎引主節於使者東北西面授使者使者受付主節主節立於使後黃門侍郎退中書侍郎引制書案立於使者東北西面中書侍郎取制書持案退自

使後立於使者之左西面授使者使者受制書置於案持案者退立於使後中書侍郎退典儀曰再拜贊者承傳羣官在位者皆再拜舍人引使者主副出持節者前導持案者次之侍中前跪奏稱侍中臣某言禮畢俛伏興還侍位皇帝降座御輿入自東房侍衛警蹕如來儀舍人引羣官在位以次出初使主副乘輅備儀仗而行鼓吹備而不作從者乘車以從其制書油絡網犢車載而行自後皆如之

納綵

前一日守宮設使者次於后氏大門外道右南向其日

大昕使主副至於后氏大門外掌次者迎入次凡賓主及行事者皆主人受於廟無廟者受於正寢掌事者設神席於室戶外之西莞筵紛純如藻席畫純南向右雕几使主副出次謁者引立於大門外之西東面北上持幡節者立於使者之北少退東面令史二人對舉制案立於使者之南執鴈者又在其南俱東面主人立於大門內西面僮者立於主人之左北面受命出立門東西面曰敢請事使者曰某奉制納綵僮者入告主人曰臣某之女若如人既蒙制訪臣某不敢辭僮者出告入引主人出迎使者於大門外之南北面主人再拜使者不答拜主人揖使

者先入於階使者及宗正卿入幡節先導其持節案及

執鴈者從入幡節立西階之西東門自後幡節皆如之使者由

西階升於兩楹間南面使副在使者西南執案及執鴈

者在使副西南俱東面主人升阼階詣使者前北面持

案者以案進使副前使副取制書持案者退復位使副

奉制書進授使者退復位持節者脫節衣使者曰有制

主人再拜宣制畢主人降詣階間北面再拜稽首訖升

進北面受制書退以授左右仍北面立使副取鴈以授

使者退復位使者受鴈主人再拜進受鴈退以授左右

仍北面立僮者引二人對舉答表案進於主人後少西

儀者取表以授主人主人進授使者訖退復位再拜持節者加節衣謁者引使者及使副等降自西階以出

制文

凡六禮皆以版長一尺二寸博四寸厚八分后家答版亦如之

皇帝曰咨具官封姓渾元資始肇經人倫爰及夫婦以奉天地宗廟社稷謀於公卿咸以為宜率由舊典今使持節太尉封某宗正卿封某以禮納綵

答文

皇帝嘉命訪婚陋族備數采擇姑姊妹則云先臣某官之遺女未閑教訓衣履若如人欽承舊章肅奉典制某官封臣姓名稽首頓首再拜承制詔

問名

使者既出遂立於內門外之西東向並如納綵位初使者降主人降立於內門內東廂西面儀者進受命出請事使者曰將加卜筮奉制問名儀者入告主人曰臣某之子若如人既蒙制訪臣某不敢辭儀者出告入引主人出迎使者至主人受鴈訖出如納綵儀使者出立於內門之西使副在南少退俱東面初使者降主人使者立於東階下西面儀者進受命出請事使者曰禮畢儀者入告主人曰某公奉制至於某之室某有先人之禮請禮從者儀者出告使者曰某既得命將事敢辭儀者

入告主人曰先人之禮敢固以請僎者出告使者曰某辭不得命敢不從僎者入告遂引主人升立於序端掌事者徹几改設二筵東上各用莞筵紛純加藻績席純設甒醴於東房西牖下加勺冪坩在罇北實觶二角枳二各一籩一豆實以脯醢在坩北又設洗於東階東南如常訖僎者引主人降迎使者於內門外之東西面揖使者先入使者入門而左副從之主人入門而右至階主人曰請某位升使者曰某敢辭主人曰固請某位升使者曰某敢固辭主人曰終請某位升使者曰某敢終辭主人升阼階使者升西階副從升俱北面主人阼階上北面再拜

使者及副西階上北面答再拜主人受几於序端掌事者內拂几三奉兩端西北向以進主人東南向外拂几三振袂內執之掌事者又一人又執几以從主人進西北向使者序進迎受於筵前東南向以俟主人還東階上北向再拜送使者以几筵進北面跪各設於座差退於西階上北面東上俱答再拜立於階西東面南上贊者二人俱升取觶降盥手洗觶升實醴加枳於觶覆之面葉出房南面主人受醴面柄進使者筵前西北面又贊者執觶以從使者西階上北面各一拜序進筵前東南面主人又以次授醴使者受俱復西階上位主人退

復東階上北面一拜送掌事者以次薦脯醢於筵前使者各進升筵皆坐左執觶右取脯孺於醢祭於籩豆間各以杞祭醴三始版一祭又版再祭興各以杞兼諸觶上獵降筵於西階上俱北面坐俱啐醴建杞各奠觶遂拜執觶主人答拜使者進升筵坐各奠觶於薦東降筵序立於西階上東面南上掌事者牽馬入陳於門內三分庭一在南北首西上又掌事者奉幣升東階以授主人主人受於序端進西面掌事者一人又奉幣籠立於主人之後使者西階上俱北面再拜主人進詣楹間南面立使者序進立於主人之西俱南面主人以幣籠授

使者使者受退立於西階上東面掌事者又以幣籠授主人主人受以授使副使副受退立於使者北俱東面主人還東階上北面拜送使者降西階從者迓受幣使者當庭實揖馬出牽馬者從出使者出大門之外西東面立從者迓受馬主人出門東西面再拜送使者退主人入立於東階下西面僮者告主人曰賓不顧矣主人反於寢使者奉答表詣闕進

制文

皇帝曰咨某官封姓兩儀配合承天統物正位乎內必俟令族重章舊典今使使持節太尉封某宗正卿封某

以禮問名

答文

皇帝嘉命使者某重宣中制問臣名族臣女夫婦所生先臣故某官之遺元孫先臣故某官之遺曾孫先臣故某官之遺孫先臣故某官之外孫女年若干欽承舊章謹奉典制某官某臣姓某稽首頓首再拜承制詔若女上在則直云某官祖以臣之孫女等語

納吉

前一日守宮設使者次以下至主人立於大門內西面如納綵儀儻者進受命出請事使者曰加諸卜筮占曰

從制某也納吉儻者入告主人曰臣某之女若如人龜筮云吉臣占在焉臣某謹奉典制儻者出告入引主人出迎使者於大門外以下至使者降自西階以出如納綵儀使者出立於內門外之西使副在南少退俱東面初使者降主人立於東階下西面儻者進受命出請事使者曰禮畢其實使者如問名之儀

制文

皇帝曰咨某官姓人謀龜從僉曰貞吉敬順典禮今使使持節太尉封某宗正卿封某以禮吉

答文

皇帝嘉命使者某重宣中制太卜元吉臣陋族卑鄙憂懼不堪欽承舊章肅奉典制某官臣姓某稽首頓首再拜承制詔

納徵

前一日守宮設使者次如初其日大昕使主副至后氏大門外掌次者延入次執事者入布幕於內門外元纁束帛陳於幕上六馬陳於幕南北首西上執事者奉穀珪以匱俟於幕東西掌事者設几筵如初使主副出次謁者引立於大門之外西東南面北上持幡節者立於使之北少退東面令史二人對舉制案立於使副南東

面主人立於大門內西面僮者進受命出請事使者曰某奉制納徵僮者入告主人曰奉制賜臣以重禮某祇奉典制僮者出告入引主人出迎使者於大門外之南北面主人再拜使者不答拜謁者引使者及使副入幡節前導持案者從入使者入門而左主人入門而右至於內門使主副立於門西東面北上主人立於門東西面僮者引主人揖使者先入門至階使副從入由西階升立於楹間南面使副在使者西南持案者在使副西南俱東面主人由阼階詣使者前北面立執事者坐啓匱取珪加於元纁上及牽馬者從入三分庭一在南北

首西上執珪者在馬西俱北面持案者以案進使副前使副取制書持案退復位使副奉制書進授使者退復位持節者脫節衣使者曰有制主人再拜使者宣制畢主人降詣階間北面再拜稽首訖升進北面受制書退以授左右仍北面立僮者引二人對舉答表案進主人後少西僮者取表以授主人主人受以授使者訖退復位再拜謁者引使者及使副等降自西階以出立於內門外之西使副在南少退俱東面初主人受制書訖左右受玉帛於庭受馬者自左受之以東牽馬者既授馬自前面而出主人降立於東階下西面僮者進受命出

請事使者曰禮畢其賓使者如納吉之儀

制文

皇帝曰咨某官姓之女有母儀之德窈窕之姿如山如河宜奉宗廟永承天祚以元纁車馬以章典禮今使使持節太尉封某宗正卿封某以禮納徵

答文

皇帝嘉命使者某重宣中制降婚卑陋崇以上公寵以豐禮備物典冊欽承舊章肅奉典制某官臣姓名稽首頓首再拜承制詔

告期

前一日守宮設使者次以下至出請事如納綵儀使者
曰制使某告期僮者入告主人曰臣某謹奉制僮者出
告入引主人出迎使者以下至禮畢如納綵儀

制文

皇帝曰咨某官姓謀於公卿大筮元龜罔有不臧率遵
典禮今使使持節太尉封某宗正卿封某以禮告期

答文

皇帝嘉命使者某重宣中制告曰惟某月某日可迎臣
欽承舊章肅奉典制某官臣姓某稽首頓首再拜承制
詔

告廟

有司以特牲告如常告禮祝文臨時撰

冊后

前一日守宮設使者次於后氏第大門外之西如常尚
舍設尚宮以下次於后氏閣外道西東向障以行帷其
日臨軒命使如納綵命使之儀

太尉為正使
司徒為副使

奉禮設使

者位於大門外之西東向使副及內使位於使者之南
舉冊案及寶綬者在南差退持節者在使者之北少退
俱東面設主人位於大門外之南北面設使者以下及
主人位於內門外亦如之設內謁者監位於內門外主

人之南西面謁者監設司贊位於東階東南掌贊二人
在南差退俱西向內謁者監又先置一案於閣外近限
使主副乘輅持節備儀仗鼓吹備而不作至后氏大門
外使者降輅掌次者延入次尚宮以下至客之次內僕
進重翟以下大門外道西東向北上諸衛令其屬布后
儀仗如常使者出次謁者引使者以下就門外位主人
朝服出立於東階下西面儻者進受命出門東西面曰
敢請事使者曰某奉制授皇后備物典冊儻者入告遂
引主人出迎於大門外北面再拜使者不答拜謁者引
使者入門而左持節者前導持案者次之主人入門而

右至內門外各就位立定奉冊寶案者進當使副前使
副受冊寶持案者退復位使副以冊寶進授使者退復
位內侍進使者前西面受冊寶東面授內謁者監復位
內謁者監持冊寶入立於閣外之西東面跪置冊寶於
案俛伏與上宮以下入閣奉后首飾禕衣其衣服所傳
司先進

姆贊出尚宮引降立於庭中北面尚宮跪取冊尚服跪
取寶綬興立於后之右少前西向司言司寶各一人進
於后左少前東向尚宮稱有制尚儀贊皇后再拜皇后
再拜宣冊訖尚儀又贊皇后再拜皇后再拜尚宮奉冊
進授皇后皇后受以授司言尚服又奉寶綬進授皇后

皇后受以授司寶訖尚儀贊皇后升座尚宮引皇后升座南向坐內官以下俱降立於庭重行北向西上立定司贊曰再拜掌事承傳內官以下皆再拜訖諸應侍衛者各升立於侍位尚儀前跪奏稱禮畢皇后降座尚宮引皇后入於宮主人賓使者如告期之儀前使者乘輅而還詣闕復命

冊文

維某年月日皇帝使使持節太尉封某司徒封某冊命某官女某氏爲皇后咨爾易階乾坤詩首關雎王化之本實由內輔是故皇英嬪虞帝道以光太妊妣姬周允克昌皇后其祗勗厥德以肅承宗廟虔恭中饋盡敬於婦道師道於六宮作範儀於四海皇天無親惟德是依可不慎歟

命使奉迎

其日晡後侍中量其時刻版奏請中嚴晡後三刻皇帝服袞冕出升所御殿宮人侍衛如常文武之官五品以上立於東西朝堂如常儀奉迎前一日守宮設使者次於大門外道右設使副及內侍次於使者次西俱南向尚舍設宮人次於閣外道西奉禮設使者位於大門外之西東向使副位於使者之南持案及執鴈者又在南

差退持節者在使者北少退俱東向奉禮位於使副西南贊者二人在南差退俱東面設內侍位於大門外道左西面其日司贊設宮人以下位於堂前使主副朝服發朝堂乘輅持節備儀仗至大門外使者降輅掌次者延入位宮人等各之次奉迎文武官至宿衛及列鹵簿如常儀尚儀奏請皇后中嚴量時刻姆傳導皇后尚宮前引出升堂宮人等待衛如常儀皇后將出主婦出於房外之西南文武奉迎者皆陪立於大門外文東武西北上位定謁者引使者謁大門外位使副內侍等各就位主人立於內門外堂前東階下西面僮者受命出請

事使者曰某奉制以今吉辰率職奉迎僮者入告主人曰臣謹奉典制僮者出告入引主人出門南北面再拜使者不答拜謁者引使者入門而左持節者前導使副及持案執鴈者次之主人入門而右至內門外堂西階使者先升立於兩楹間南面使副在使者西南持案及執鴈者在使副西南俱東面主人升東階詣使者前北面立持案者以案進使副前使副取制書持案者退復位使副奉制書授使者退復位使者曰有制主人再拜使者宣制畢主人降詣階間北面再拜稽首訖升進北面受制書退授左右訖主人再拜進受鴈授左右仍北

面立僮者引二人對舉答表案進立於主人後少西僮者取表以授主人主人受以授使者訖退復位再拜謁者引使者及使副降自西階以出復門外位立定奉禮曰再拜贊者承傳使主副俱再拜使者曰今日吉日某等承制率職奉迎內侍受以入傳於司言司言受以奏聞尚儀奏請皇后再拜皇后再拜訖主人升自東階進西面誠之曰戒之敬之夙夜毋違命主人退立於東階上西面毋誠於西階上施衿結帨曰勉之敬之夙夜無違命訖腰輿進皇后升輿以降尚宮前導六尚以下侍衛如常皇后升重翟以几姆加幪內官侍從及內侍導

引應乘車從者如鹵簿常儀奉迎使及百官當引從者皆退隨便立俟皇后車出大門外以次乘車馬引從如常

制文

皇帝曰咨某官姓歲吉月令吉日惟某率由典禮今遣使持節太尉封某宗正卿封某以禮迎

答文

皇帝嘉命使者某重宣中詔令月吉辰備禮以迎螻蟻之族猥承大禮憂懼戰悸欽承舊章夙奉典制某官臣姓某稽首頓首再拜承詔制

同牢

其日內侍之屬設皇后大次於皇帝所御殿門外之東南向鋪座如常將夕尚寢設皇帝御幄於所御之殿室內之奧東向鋪地席重茵施屏障初昏尚食設洗於東階東南東西當東霤南北以堂深罍水在洗東篚在洗西南肆篚實以巾二爵二設后洗於東房近北罍水在洗西篚在洗東北肆皆加勺幕饌於東房西牖下邊豆各二十四簋簠各二甄各三皆加巾蓋俎三罇於室內北牖下元酒在西加纂勺南柄纂夏用絺冬用緡又罇於房戶外之東無元酒其器皆以漆惟甄以陶在南加四爵合盃皇后重翟

入大門鳴鐘鼓

其鐘鼓所司先陳設鳴鼓鐘者所以聲告內外

鹵簿止於外近

侍應從者如常皇后從永巷至大次前廻車南向施步

障畢尚儀進當車前跪奏請降車輿退復位皇后降車

御輿司輿率繖扇等司燈率執燭者俱布列前後皇后

入就大次嚴整訖尚宮引皇后詣所御殿門外之東西

向立尚儀跪奏外辦請降座禮迎皇帝降座尚宮前引

詣門內之西東面揖后以入尚食徹罇莞筵紛純加藻席績纂酌元酒三注

於罇尚寢設席於室內之西東向

純次席黼純對席亦

此準皇帝導后升西階入室即席東向立皇后入立於罇

西南向皇帝盥於南洗皇后盥於北洗尚食率其屬以

饌入設醬於席前菹醢在其北俎三入設於豆東豕俎

特於菹北豆東菹醢之東尚食設黍於醬東稷稻粱又在東設

滫於醬南饌西方也設對醬於東對醬后醬也菹醢在其南

北上設黍於豕俎其西稷稻粱設滫於醬北尚食啓會

郟於盤簋之南對簋簋於北啓發也豆蓋徹於房各加七箸尚寢

設對席於饌東尚食西面跪奏饌具興皇帝揖皇后對

席西面皆坐尚食跪取韭菹搗醢授皇帝又尚食跪取

韭菹搗醢授皇后皇帝及皇后俱受祭於豆間尚食又

取黍實於左手遍取稷稻粱反於右手授皇帝又尚食

取黍實於左手遍取稷稻粱反於右手授皇后皇帝及

皇后俱受祭於豆間尚食各以肺加於俎司飾二人以

巾授皇帝及皇后俱悅手訖尚食各跪品嘗饌訖各移

黍置於席上以次授肺脊皇帝及皇后皆食三飯卒食

尚食二人俱盥手洗爵於房入室詣酒罇所酌酒進授

皇帝及皇后俱受爵祭酒尚食各以肝從皆奠爵振祭

嚌之尚食皆受實於菹豆各取爵皆飲訖尚儀俱進受

虛爵奠於坫再酌如初三酌用盞如再酌尚食俱降東

階洗爵升酌於戶外罇進北面俱奠爵興再拜跪取爵

祭酒遂飲卒爵奠爵遂拜執爵奠興降奠於筐還侍立

尚儀北面跪奏稱禮畢興皇帝皇后俱興尚宮引皇帝

乾隆十二年校刊
欽定四庫全書
禮記卷之六
帝系六
十一

入東房釋冕服御常服又尚宮引皇后入幄脫服尚宮引皇帝入尚食帥其屬徹饌於東房如初皇后從者餽皇帝之饌皇帝侍者餽皇后之饌

皇后表謝

皇后至宮之日服展衣出司言引尚宮尚宮前導及左右侍從如常升正殿兩楹間北面立又尚儀以謝表授皇后又尚儀以案俟於前皇后置表案上尚宮贊拜皇后再拜訖尚儀以表降殿授內侍因中書以聞初內侍出門皇后降殿還寢如常

朝皇太后

其日大昕所司設皇太后御座地席於所御之殿南尚食帥司膳設側罇甒醴於東房內東壁下加勺冪籩一豆一實以脯醢設於罇北又設洗於罇西近北冪水在洗西筐在洗東北肆

筐實以巾冪角一解一角相一

其日皇后夙興沐

浴尚儀版奏請皇后中嚴質明六尚及諸侍衛宮人俱詣於寢殿奉迎尚儀版奏外辦皇后服褙衣加首飾御輿尚宮前導降自西階以出侍衛如常至皇太后閣外皇后降輿障扇侍從如常立於西廂東面皇后將至尚儀奏請皇太后中嚴皇后既至閣外尚儀奏皇太后外辦皇太后服褙衣首飾司言引尚宮尚宮引皇太后出

卽御座前南向坐侍從如常皇后執筭棗栗脯脩司言
引尚宮尚宮引皇后入升西階北面再拜司言引尚儀
尚儀引皇后進跪奠筭於皇太后座前皇太后撫之尚
食進徹以東司言引尚宮尚宮引皇后退北面又再拜
司設設皇后席於戶牖之間近北南向司言引尚宮尚
宮引皇后立於席西南向尚食於東房盥手洗觶酌醴
加柶面柄出進詣皇后席前北向立皇后進北面再拜
受醴尚食薦脯醢於席前皇后升席坐左執觶右取脯
搗於醢祭於籩豆間以柶祭醴三始一版祭又版再祭
加柶於觶面葉與降席北面跪啐醴建柶與北面再拜
進升席跪奠觶於薦東與降席司言引尚宮尚宮引皇
后降自西階以出御輿而還侍從如來儀初皇后出閣
尚儀跪奏稱禮畢俛伏興還侍位皇太后降座入室如
常

皇后受羣臣賀

右如正冬賀儀唯辭云具官臣某等言伏惟殿下徽猷
昭備至德應期凡厥黔黎不勝慶躍

皇帝會羣臣

右如正冬會儀唯樂備而不作又上壽辭云具官臣某
等言伏惟皇后坤儀配天德昭厚載克榮萬葉明嗣徽

音凡厥元庶載懷鳧藻臣等不勝慶忭謹上千秋萬歲
壽

外命婦朝會

右如正冬朝會唯賀辭云某位妾姓等言伏惟殿下坤
象配天德昭厚載率土含識不勝忭舞會辭唯嘉謹上
千萬歲壽

羣臣上禮

如加元服上禮之儀

皇后廟見

前一日皇后清齋於別殿內官應從入廟者俱清齋一
日於殿所諸衛令其屬輔後一刻各以其方器服守衛

廟門與太樂工人俱清齋一宿前一日尚舍直長施皇
后大次於太廟北門內之西東向周以行帷尚舍奉御
鋪御座尚舍直長又量設內官以下次於大次之後守
宮設外命婦妃主以下次於廟北門外之西道北南向
東上周以行帷設行事太尉以下次於齋坊之內太樂
令設宮懸之樂於廟庭如式前一日右校清掃內外內
謁者監設皇后版位於樂懸之北道西北向設外命婦
位於其次前北面東上奉禮設太尉以下及御使等位
於內外並如常儀設酒罇之位於廟堂上前楹間各於
室戶之左北向每室彝二罇二

春夏用雞彝罇秋
冬用犛黃彝著罇山壘

二皆加勺鬯皆西上各有站以置設洗於東階東南北

向以下至太祝持版如加元服謁廟儀太祝持版進於

室戶外之右東向跪讀祝文曰維某年歲次月朔日子

孝曾孫開元神武皇帝某太祖以下謹遣太尉封臣名

敢昭告於皇祖某謚皇后某氏太祖以下廟將伸祇見

謹以一元太武明粢薌箕嘉蔬嘉薦醴齊敬薦尚饗訖

興太尉再拜初讀祝文樂作太祝進跪奠版於神座前

俛伏興還罇所太尉拜訖樂止謁者引太尉以次獻如

祖之儀惟不盥洗徧獻訖以下如加元服謁廟儀唯執事則

每事訖還齋所

車駕出宮

前出宮三日本司宣攝內外各供其職其日晝漏上水

四刻車駕出宮發引前七刻搥一鼓為一嚴三嚴時刻前一日内

侍中發引前五刻搥二鼓為再嚴尚儀版奏請中嚴司

贊設內命婦版位於皇后所御殿閣外道東重行西向

北上內命婦各服其服所司陳小駕鹵簿發引前二刻

搥三鼓為三嚴司賓引內命婦各就位六尚以下各服

其服俱詣室奉迎尚服負內僕進重翟於閣外尚儀版

奏外辦馭者執轡皇后首飾褱衣乘輿以出警蹕侍衛

如常儀皇后升車仗衛如常六尚等乘車陪從如式司

賓引內命婦退隨近以俟諸翊駕之官皆乘馬駕動稱
警蹕如常不鳴鼓角諸衛前後督攝如常外命婦三品
以上及公主縣主皆先至各就次俱服其服車駕將去
內外之屬守廟四門內謁者贊外命婦妃主等出次內
典引引就位立駕過引還次初駕將至內侍之屬守廟
四門駕至廟北門迴車北向尚儀進當前跪奏稱尚儀
妾姓言請降車輿還侍位皇后降車升輿入大次繖扇
華蓋侍衛如常儀鹵簿停於廟外皇后停大次半刻頃
司言引尚宮立於大次門外當門西向尚儀版奏外辦
皇后出次侍衛如常尚服負璽陪從如式司言引尚宮尚宮引皇

后

凡尚宮前導皆司言先引

至版位北向立尚宮與司言退立於左

皇后立定尚宮前奏請再拜皇后再拜少頃尚宮又奏

請再拜皇后再拜見司言引尚宮尚宮引皇后還大

次內侍版奏請解嚴

將士不得輒離部伍

皇后停大次半刻頃搥

一鼓爲一嚴轉仗衛於還途如來儀三刻頃搥二鼓爲

再嚴尚儀版奏請中嚴皇后改著鈿釵禮衣五刻頃搥

三鼓爲三嚴六尚以下詣大次奏迎內僕進重翟於廟

北門外尚儀版奏外辦馭者執轡皇后乘輿出次華蓋

侍衛如常皇后升車鼓吹振作而還六尚等升車陪從

如來儀皇后將出門內謁者贊引外命婦等出次內典

引引就位駕至位所內侍奏請駕權停外命婦再拜訖
內侍承令令外命婦還外命婦又再拜車駕還內典引
引外命婦各還第駕至所御殿閣外迴車南向尚儀進
當車前跪奏稱尚儀妾姓言請降車還侍位皇后降車
輿以入侍衛如常於車駕將至司賓引內命婦俱就位
皇后既入司賓引內命婦退內侍版奏請解嚴將士各
還其所

皇帝臨軒冊命皇后儀

卜日告園丘方丘太廟並有司行事如常告儀

臨軒命使

將行冊禮所司奏請太尉爲使司徒爲副前一日尚舍
奉御設御幄於太極殿庭陳設樂懸內外官次侍衛警
蹕並如納后儀皇帝將出仗動太樂令令撞黃鍾之鐘
右五鐘皆應協律郎跪俛伏興舉麾鼓祝奏太和之樂
鼓吹振作皇帝出自西房卽御座南向坐符寶郎奉寶
置於御座如常樂止通事舍人引冊使副入就位太尉
初入門舒和之樂作至位樂止立定典儀唱曰再拜贊
者承傳命羣官在位者皆再拜侍中前承制降請使者
前東北西面稱有制冊使再拜侍中宣制曰冊某氏爲
皇后命公等執節展禮宣制訖又俱再拜侍中還侍位

黃門侍郎持節西面授太尉太尉受付主節立於使後
黃門侍郎退中書侍郎引冊案及琮璽綬案立於冊使
東北面中書侍郎取冊持案者退自使後
立於太尉之左西面授太尉
太尉受冊置於案持案者退立於使者後中書侍郎又
取琮璽綬以授太尉太尉受置於案皆如受冊之儀中
書侍郎退典儀曰再拜贊者承傳羣臣在位者皆再拜
通事舍人引冊使出持節者前導持案者次之太尉初
行樂作出門樂止侍中前奏稱侍中臣某言禮畢俛伏
興還侍位皇帝降座侍衛警蹕如來儀入自東房樂止
通事舍人引羣官在位者以次出蕃客
先出

皇后受冊

前一日守宮於肅章門外道西近南隨使設太尉司徒
等次東向北上又於命婦朝堂設外命婦次如常尚寢
率其屬於皇后正殿設御幄座南向又設皇后受冊位
於殿庭階間北向又設命婦等脫舄席於西階前近西
東向太樂展宮懸之樂於殿庭設麾於殿上西階之西
東向並如常內僕進重翟以下於肅章門外道東西向
以北爲上其日依時刻諸衛勒所屯門列仗及陳布於
皇后殿正南門之內如常儀典儀設冊使位於肅章門
外之西東向北上設內侍位於使副之南舉冊案及琮

璽綬者位南向差退俱東面又設內給事位於北廂南向又設內謁者監位於其東南西向內謁者設外命婦位於命婦朝堂分左右廂大長公主以下在東太夫人以下在西並每等異位重行南向以北爲上司贊設內命婦及內官非供奉者位於受冊正殿之庭東廂西向重行北上又設內命婦等朝位於殿庭御道東行北面西上又設外命婦朝位於殿庭御道左右近南大長公主以下在東北面西上太夫人以下在道西每等異位重行北面以東爲上又設司贊位於東階東南典贊二人南差退俱西向內侍版奏皇后請中嚴外命婦依

時刻俱赴集朝堂次各服其服內謁者監先置二案於肅章門外近限太尉司徒旣受命出至朝堂俱乘輅備鹵簿鼓吹持節如式其冊璽綬各以油絡網犢車載而行內侍之屬與所司守掌之至永安門外降輅謁者引入持節者前導持案者次之掌次者俱引入次內典引引外命婦就朝堂位司樂帥工人入就位典樂升就舉麾位司贊帥典贊先就殿庭位內典引各引外命婦兩行俱以次進至肅章門司賓接引進入立於皇后正殿閣外如朝堂之位謁者引太尉以下就肅章門外持節者立於太尉之北少退東面內謁者監引內給事就

南面位內謁者監退復位內命婦等應陪列者各服其服司賓引就陪列位尚儀版奏外辦皇后首飾禕衣司言引尚宮尚宮引皇后出自正殿西房侍衛警蹕如常

儀首飾禕衣典樂舉麾奏正和之樂凡樂皆典樂舉麾鼓祝而後作偃麾

憂敬而後止皇后至兩楹間南向立定樂止初內給事既就

南面位太尉進內給事前北向跪稱太尉封臣某司徒封臣某奉制授皇后備物典冊訖俛伏興退復位內謁者監引內給事詣肅章門傳告司言司言入詣皇后前跪奏訖興還侍位初司言入奉冊琮璽綬者以次進當司徒前司徒取冊琮璽綬以次進授太尉舉案者以次

退司徒授訖退復位內侍進太尉前西面以次受冊琮

璽綬東面授內謁者監量以內謁者等助舉之退復位內謁者監

持冊琮璽綬等進立於肅章門外跪置冊琮璽綬於案俛伏興初司言奏訖尚儀贊皇后降司言引尚宮尚宮引皇后初行樂作立定樂止初皇后將降又尚宮詣門取冊尚服詣門跪取琮璽綬興進俱立入於皇后之右西向司言司寶各一人進立於皇后之左少前東向尚

宮稱有制尚儀贊皇后再拜尚宮宣冊訖尚儀又贊皇后再拜尚宮奉冊進授皇后皇后受以授司言尚服又奉琮璽綬以次授皇后皇后以授司寶訖尚儀贊皇后

升御座皇后御輿繖扇侍衛如常皇后升初行樂作卽御座南向坐司璽奉琮璽置於御座樂止司賓引內命婦等陪列者以次進就北面位爲首者初行典樂舉麾舒和之樂作至位樂止司贊曰再拜掌贊承傳內命婦皆再拜司賓引爲首者一人詣西階初行樂作至階樂止爲首者脫舄升進當御座前北面跪奏某妃妾姓等言伏惟殿下坤象配天德昭厚載凡厥兆庶不勝慶躍訖起司賓引爲首者自西階降納舄樂作復位樂止司贊曰再拜掌贊承傳內命婦等皆再拜司言前承令降自西階詣內命婦西北東面稱令旨內命婦等皆再拜

宣令訖在位者又再拜司贊曰再拜典贊承傳在位者皆再拜司賓以次從隨使出門各還其寢爲首者初行樂作至門樂止司賓又引外命婦以次入爲首者初入門舒和之樂作至位樂止立定司贊曰再拜掌贊承傳外命婦等皆再拜訖司賓引爲首者一人進升奉賀復位拜樂止及宣令拜拜辭等皆如內命婦之儀訖引出爲首者初行樂作出門樂止司言又奏羣官賀訖尚儀前跪奏稱尚儀妾姓言禮畢退還侍位皇后降座樂作御輿入自東房侍衛警蹕如儀樂止女工人退冊命使者乘輅詣朝堂至降輅入至太極殿庭大橫街南御道

文獻通考卷三百五十五
三十一
東北面西上立中書令於太極殿東北面西太尉等再拜復命日奉制授皇后備物典冊禮畢又再拜中書令奏聞太尉等退鹵簿幡節等還本司

皇后受羣臣賀

皇后表謝

朝皇太后

皇帝會羣臣

皇后會外命婦

皇后廟見 右並如納后儀

皇太子納妃儀

臨軒命使

將行納采制命使者吏部承以戒之前一日尚舍奉御設御幄於太極殿北壁下南向衛尉設羣官次於東西朝堂太樂令展宮懸並如常儀其日典儀設文武一品以下五品以上位於橫街之北西面北上朝集使五品以上合班六品以下位於橫街南朝集使六品以下合班蕃客又於其南皆西面北上設武官五品以上位於橫街北東面北上朝集使五品以上合班諸親位於其南六品以下位於橫街南朝集使六品以下蕃客等又在南皆東面北上設典儀位於懸之東北贊者二人在

南少退俱西向設舉麾位於殿上西階之西東面設使者受命位於橫街南道東北面西上奉禮設門外位文官一品以下五品以上位於順天門外道東每等異位重行西面武官三品以下位於門西每等異位俱重行東面以北爲上未明二刻諸衛勒所部中門布黃麾半仗入陳於殿庭如常儀羣官依時刻集朝堂俱就次各服朝服侍中量時刻版奏請中嚴鈸戟近仗就陳於閣外太極令以下帥工人入就位請侍衛之官各服其器服侍中中書令以下諸侍臣俱謁閣奉迎典儀帥贊者先入就位吏部兵部各贊羣官出次典謁各引就門外

位侍中版奏外辦皇帝服袞冕出坐如常儀通事舍人引羣官以次入就位立定典儀曰再拜贊者承傳羣官在位者皆再拜吏部與禮部侍郎贊使主副出典謁引就受命位侍中前承制降詣使者西北東面稱有制使主副俱再拜侍中宣制畢使主副又再拜侍中還侍位典謁引使主副出初使者將出典儀曰再拜贊者承傳羣官在位者皆再拜承傳通事舍人引羣官出侍中前跪奏稱侍中臣某言禮畢俛伏興還侍位皇帝降座入自東房侍衛警蹕如來儀侍臣從至閣使主副乘輅備儀仗而行從者乘車以從

納綵

前一日主人設使者次於大門之外道右南向其日大

昕使者公服至於妃氏大門外掌次者延入次凡賓主

皆公服主人受其禮於廟無廟者受於正寢掌事者布神席於室

戶外之西莞筵紛純加藻席畫純南向右雕几使者出

次謁者引立於大門外之西東面主人立於大門內西

僮者立於主人之左北面受命出立於門東西面曰敢

請事使者曰奉制作儷儲宮允歸令德率由舊章使某

納綵僮者入告主人曰臣某之女不教若如人既蒙制

訪臣某不敢辭僮者出告掌畜者以鴈授使副進授使

者退復位使者左手執之僮者引主人迎於大門之南

北面再拜使者不答拜謁者引使者入門而左主人入

門而右使者升自西階立於楹間俱南面西上主人升

自東階進使者前北面使者曰某奉制納綵主人降詣

階間北面再拜稽首升進北面受鴈退位於東階上西

面使者降自西階以出

問名

使者既出立於門外之西東面初使者降左右受鴈於

序端主人降立於內門東廂西面僮者進受命出請事

使者曰某將加卜筮奉制問名僮者入告主人曰制以

某之子備數於儲宮臣某不敢辭僨者出告掌畜者以
鴈授使副主人拜迎入俱升堂南面如納綵儀使者曰
某奉制問名將加諸卜筮主人降詣階間北面再拜稽
首升進北面受鴈少退仍北面曰臣某第某女某氏出
使者降自西階出立於內門外之西東面初使者降主
人退於阼階東左右受鴈於序端主人降立於內門東
廂西面僨者進受命出請事使者曰禮畢僨者入告主
人曰某公爲事故至某之室某有先人之禮謹禮從者
其儀與納
后禮賓同

納吉

前一日主人設使者次如常其日大昕使者至妃氏大
門以下僨者出請事如納綵儀使者曰加諸卜筮占曰
協從制使某也納吉僨者入告主人曰臣某之子弗敬
唯恐不堪龜筮云吉臣某謹奉典制僨者出告掌畜者
以鴈授使副主人迎拜入俱升堂南面並如納綵儀主
人降詣階間北面再拜稽首升進北面受鴈使者降自
西階立於大門外之西東面外初使者降主人還阼階
東左右受鴈於序端主人降立於內門西面僨者進受
命出請事使者曰禮畢其賓使者皆如問名之儀

納徵

前一日主人設使者次如常儀其日大昕使者至妃氏大門外掌次者延入次執事者設布幕於內門之外元纁束帛陳於幕上乘馬陳於幕南北首西上執事者奉穀珪以匱俟於幕東西面主人掌事者設几筵如常使者出次謁者引立於大門外之西東面主人立於大門內西面僮者進受命出請事使者曰制使某以玉帛乘馬納徵僮者入告主人曰奉制賜臣以重禮臣某祇奉典制僮者出告又僮者引主人迎於大門外之南北面再拜使者不答拜謁者引使者入門而左主人入門而右至於內門外使者立於門西東面北上主人立於門

東西面執事者坐啓匱取珪加於元纁上典以授使副使副進授使者退復位使者受玉帛謁者引使者入門而左主人入門而右牽乘馬者從入三分庭一在南首西上使者升自西階立於楹間俱南面西上主人升自東階進使者前北面使者曰某奉制納徵主人降階間北面再拜稽首升進北面受玉帛使者降自西階出立於內門外之西東面初使者降主人還阼階東左右受玉帛受馬自左受之以東牽馬者既授馬自前面出僮者進受命出請事使者曰禮畢其賓使者如納吉之儀

告期

前一日主人設次設几筵及僮者受命請事等並如納綵儀使者曰詢於龜筮某月某日吉制使某告期其授鴈升堂受命之儀一如納綵使者曰某奉制告期主人降詣階間北面再拜以下禮畢如納綵賓從使者如納徵

告廟

有司以特牲告如常禮祝文臨時撰

冊妃

前一日主人設使者次如常設宮人次於使者西南俱東面障以行幃其日奉禮設使者位於大門外之西東

向使副及內侍位於使者之南舉冊案及璽綬命服者在南差退俱東向設主人位於門南北面設使者以下及主人位於內門外皆如之設典內位於內門外主人南西面設宮人位於門外於使者之後俱重行東向以北爲上障以行幃設贊者二人於東階東南西向典內先置一案於閣外近限使主副朝服乘輅持節備儀仗鼓吹備而不作至妃氏大門外使者降輅掌次者延入次宮人等各之次掌嚴奉綸翟衣及首飾內廐尉進厭翟車於大門之外道之西東向以北爲上諸尉率其屬布妃儀仗如常使者出次典謁引使者以下持節者前

導及宮人典內各就位持節者立於使者之北少退俱東向主人朝服出迎於大門外之東西面立定少頃北面再拜使者不答拜典謁引使者持節者前導入門而左持案以下從之主人入門而右至內門外各就位立定奉冊寶案者進當使副前使副受冊寶奉案者退復位使副以冊寶進授使者退復位內侍進使者前西面受冊寶東面授典內退復位典內持冊寶立入於閣外之西東面跪置冊寶於案典內俛伏興奉衣服及侍衛者從入皆立於典內之南俱東面北上傅姆贊妃出引立於庭中北面掌書進跪取玉寶興進立於妃前南向

掌嚴奉首飾及綸翟與諸宮侍衛者次入侍衛如常典內還復位司則前贊妃再拜還侍位妃再拜司則進掌書前北面受冊寶進妃前南向授妃妃受以授司閨司則又前贊妃再拜還侍位妃又再拜訖司則前請妃升座還侍位司閨引妃升座南向坐宮官以下俱降立於庭重行北向以西爲上立定贊唱者日再拜宮官以下皆再拜訖諸應侍衛者各升立於侍位司則前啓禮畢妃降座司閨引妃入室主人賓使者如禮賓之儀使者乘輅而還

臨軒醮戒

前二日本司宣攝內外各供其職前一日衛尉設次於東朝堂之北西向又設宮官次於重明門外如常儀其日前三刻宮官俱集於次各之次皆服其服諸衛各勒所部依圖陳設左庶子贊請中嚴內僕進金輅於閣外南向率一人執刀於輅前北向前二刻諸衛之官各服其器服以次詣閣奉迎左庶子負壘如式宮官應從者各出次立於門外文東武西重行相向北上左庶子奏外辦太僕奮衣而升執轡皇太子著袞冕之服以出左右侍衛如常儀皇太子乃升僕立授綬車驅左庶子以下夾侍如常出門車權停令車右升輅陪乘宮臣上馬訖皇太

子車動鼓吹振作如式文武官皆乘馬如常至承天門下車所廻輅南向左庶子進當輅跪奏稱左庶子臣某言請降輅俛伏興還侍位皇太子降輅典謁引舍人舍人引皇太子就位侍衛如常儀前一日尚舍奉御整設御座於太極殿阼階上西南衛尉設羣官次於朝堂太樂令展宮懸於殿庭乘黃令陳車輅並加常儀其日尚舍直長鋪皇太子席位於牖間南向其席莞筵紛純尚加藻席纒純尚食奉御設酒罇於東序下有坵加勺設冪實爵一又陳籩脯一豆醢一在罇西脯前三刻典儀設羣官版位於內奉禮設版位於外如朝禮諸衛勒所部屯門布仗立

仗入陳於殿庭羣官依時刻集朝堂俱就次各服其服其侍中版奏請中嚴鈸戟近仗就陳於閣外太極令帥工人入就位脯前三刻諸侍衛之官各服其器服侍中中書令以下俱詣閣奉迎典儀帥贊者先入就次吏部兵部贊羣官俱出次通事舍人各引就門外位侍中版奏外辦皇帝服通天冠絳紗袍乘輿以出曲直華蓋警蹕侍衛如常儀皇帝將出仗動皇帝出自西房卽御座西向坐符寶郎奉寶置於御座如常通事舍人引羣官以次入就位羣官立定典儀曰再拜贊者承傳羣官在位者皆再拜初羣官入訖典謁引舍人舍人引皇太子

侍從如常式皇太子每行事左庶子執儀贊相

至懸南北面立典儀曰再拜贊

者承傳皇太子再拜典謁引舍人舍人引皇太子詣西階皇太子脫烏舍人引升就席西南面立尚食奉御酌酒於序進詣皇太子西南東面立皇太子再拜受爵尚食直長又薦脯醢於序前皇太子升薦座左執爵右取脯擣於醢祭於籩豆之間右祭酒興降席西南面坐啐酒奠爵再拜執爵興奉御受虛爵直長徹薦還於房舍人引皇太子進當御座東面立皇帝命曰往迎爾相承我宗事勗帥以敬皇太子曰謹奉制旨遂再拜舍人引皇太子降自西階納烏訖典謁引舍人舍人引皇太子

出門典儀曰再拜贊者承傳羣官在位者皆再拜通事
舍人引羣官以次出侍中前跪奏稱侍中臣某言禮畢
俛伏興還侍位皇帝降座入自東房警蹕侍衛如來儀
侍臣從至閣

親迎

前一日衛尉設皇太子次於妃氏大門之外道西南向
設侍衛羣官次於皇太子次西南東向北上皇太子既
受命遂適妃第執燭馬前鼓吹振作如式侍從如常皇
太子車至妃氏大門外次前迴輅南向左庶子進當輅
前跪奏稱左庶子臣某言請降輅俛伏興還侍位皇太

子降輅之次車將至主人設几筵如常醴女如別儀妃
服褕翟花鈿立於東房侍從如常主婦衣禮衣鈿釵立
於房戶外之西南向主人公服出立於大門之內西面

在廟則主人
以下著祭服

儻者公服立於主人之左北向左庶子前

跪奏稱左庶子臣某言請就位俛伏興還侍位皇太子
出次立於門西東面侍衛警蹕如常儻者進受命出門
東西面曰敢請事左庶子承傳進跪奏如常皇太子曰
以茲初婚某奉制承命左庶子俛伏興傳於儻者入告
主人曰某謹敬具少頃儻者出傳於左庶子奏如初儻
者引主人迎於門外之東西面再拜左庶子前跪奏稱

左庶子臣某言請答俛伏興還侍位皇太子答再拜主人揖皇太子先入掌畜者以鴈授左庶子進東南向奉授皇太子既執鴈進入侍衛者量入侍從及內門主人讓曰請皇太子入皇太子曰某弗敢先主人又曰固請皇太子入皇太子曰某固不敢先主人揖入皇太子從入皇太子入門而左主人入門而右內門主人揖入內雷將曲揖當階揖皇太子皆報揖至於階主人曰請皇太子升皇太子曰某敢辭請主人曰固請皇太子升皇太子曰某固敢辭主人又曰終請皇太子升皇太子又曰某敢終辭主人揖皇太子報揖主人升立於阼階上

西面皇太子升進當房戶前北面跪奠鴈俛伏興再拜降出主人不降送內廡尉進厭翟於內門外傅姆導妃司則前引出於母左傅姆在右保姆在左執燭及侍從如式父

少進西面戒之必有正焉若衣若花命之曰戒之敬之夙夜無違命母戒之西階上施衿結帨命之曰勉之敬之夙夜無違庶母及門內施鞶申之以父母之命命之曰恭敬聽宗父母之言夙夜無憊視諸衿鞶妃既出內門至輅後皇太子授綬母辭不受曰未教不足與爲禮妃升輅乘以几姆加幪皇太子御輪三司馭者代之皇太子出大門乘輅還宮侍衛如來儀妃仗次於後主人

使其屬送妃以儻從

同牢

其日司閨設妃次於東閣內道東南向掌筵鋪褥席將夕司閨設皇太子幄於殿室西廂東向鋪地重茵施屏障設同牢之席於室內皇太子之席西廂南向妃東廂西向席皆莞筵紛純加藻席纘純席間量容牢饌典膳監設洗於東階東南東西當霤南北以堂深罍水在洗東篚在洗西南肆篚實以二爵設妃洗在東房筵北罍水在洗西篚在洗東北肆皆加勺巾冪典膳監先設饌於房西牖下邊豆各二十簠簋各二劔各三五觥一皆加巾冪蓋俎三

罇在室內北牖下元酒在西加冪勺南柄

冪夏用絺冬用緡罇

在房戶外之東無元酒篚在南實四爵合卺

其器皆烏漆惟甌以

陶卺

皇太子車至侍臣下馬所車權停文武侍臣皆下

馬車左降立於輅右車動車右夾輅而趨車至左閣迴輅南向左庶子進當輅前跪奏稱左庶子臣某言請降輅俛伏興還侍位皇太子降輅入俟於內殿門外之東西面侍衛如常儀庶子以下皆退妃至宮門鹵簿仗衛停於門外近侍者從如常入至左閣外迴輅南向司則進當輅前啓請妃降輅掌筵依式執扇前後執燭如常儀妃降輅就次整飾司閨引妃詣內殿門西東面皇太

子揖妃以入又司閨前升自西階妃後升執扇燭者陳於東西階內皇太子即席東向立妃即席西向立司饌進詣階間北面跪奏稱司饌妾姓言請具牢饌興司則承令曰諾司饌帥其屬升奉饌入設於皇太子及妃座前醬在席前菹醢在其北俎三入陳於豆東豕俎特於俎北豆東菹醢之東司饌設黍於醬東饌在西也設對醬於東對醬婦醬也設之當特俎菹醢在其南北上設黍於豕俎北其西稷稻粱設滫於醬北司饌啓會於簠簋之南對簠簋於北啓發也豆蓋徹於房內各加七箸設訖司饌北面跪奏饌具興皇太子及妃俱坐司饌跪取脯孺於醢取韭菹孺醢授皇太子

又司饌取脯孺於醢取韭菹孺醢授妃皇太子及妃受俱祭於籩豆之間司饌興取黍實於左手徧取稷反於右手授皇太子又司饌取黍實於左手徧取稷反於右手授妃皇太子及妃各受祭於菹醢之間司饌俱興各立取脯皆絕末跪授皇太子及妃俱受又祭於菹醢之間司饌俱以脯加於俎掌嚴授皇太子巾又掌嚴授妃巾皇太子及妃俱悅手以柶板上劔徧孺之祭於上豆之間司饌品嘗皇太子饌又司饌品嘗妃饌司饌各移黍置於席上以次跪授脯脊皇太子及妃皆食以滫醬三飯卒食司饌北面跪奏稱司饌妾姓言請進酒司則

承令曰依奏興司饌北面俱盥手洗爵於房入室詣酒
罇所酌酒進北面立皇太子及妃俱再拜興一人進授
爵皇太子一人以爵授妃皇太子及妃俱受爵司饌俱
退北面答再拜皇太子及妃俱坐皇太子及妃俱祭酒
司饌各以肝從司則俱進受虛爵奠於筐司饌又俱洗
爵酌酒再酌皇太子及妃俱受爵俱飲司則進受虛爵
奠於筐三酌用盞如禮再拜皇太子及妃立於席後司
則降東階洗爵升酌於戶外罇進北面俱奠爵興再拜
皇太子及妃俱答拜司則俱坐取爵祭酒遂飲卒爵奠
爵遂拜執爵興降奠爵於筐還侍位司饌北面奏稱司

饌妾姓言牢饌畢司則承令曰諾司饌徹饌設於房司
則前跪奏稱司則妾姓言請殿下入俛伏興還侍位皇
太子入於東房釋冕服著袴褶司則啓妃入幃幄皇太
子及妃俱入室媵餽皇太子之饌御餽妃之饌

妃朝見

其日晝漏上水一刻所司列御座於所御殿阼階上西
面其席莞筵紛純加藻席畫司設設皇后座於室戶外

之西近北南向尚食帥司膳設酒罇於房內東壁下有

坵加勺罇用瓦甒邊一豆一實以脯醢設於罇北又

設洗於東房近北壘水在洗西筐在東北肆筐實以巾

一 柶其日夙興妃沐浴司則啓請妃內嚴質明諸衛帥其屬陳布儀仗如常儀近仗入陳於寢門外內廐尉進厭翟於正寢西階之前南向司則啓外辦妃服褕翟加首飾以出降自西階升輅侍衛如常至降車所司則贊妃降輅司言引妃入仗衛停於閣外障扇侍從如常妃至寢門之外立於西廂東面諸衛勒所部屯門布仗三仗入陳於所御殿閣外如常侍中奏請皇后內嚴妃既至寢門侍中版奏外辦皇帝服通天冠絳紗袍以出升自阼階卽御座西向坐侍衛如常儀尚儀又奏皇后外辦皇后褕衣首飾司言引尚宮尚宮引皇后出卽御座南

向坐侍從如常妃奉筭棗栗司饌又執奉筭服脩以從司則引妃入立於庭北再拜司賓引妃升自西階進東面跪奠筭於御座前皇帝撫之尚食進徹以東司言引妃自西階降復北面位奉筭服脩再拜司言引妃升進北面跪奠筭於皇后座前皇后撫之尚食進徹以東司言引妃退立於西序東面又再拜司設設妃席於戶牖之間近北面南向司言引妃立於席西南向尚食又入東房盥手洗觶酌醴齊加柶面柄出進詣妃席前北向立妃進東面再拜受醴尚食薦脯醢於席妃升席坐左執觶右取脯擣於醢祭於籩豆之間以柶祭醴三始極

一祭又極再祭降席進東面跪取觶興卽位席坐奠觶於薦東興降席司賓引妃降自西階出閣乘車還宮障扇侍從如來儀

會羣臣

皇帝會羣臣於太極殿如正至之儀唯上壽辭云皇太子嘉聘禮成克崇景福臣某等不勝慶忭謹上千秋萬歲壽

文獻通考卷第二百五十五

文獻通考卷第二百五十六

鄗 陽 馬 端 臨 貴 與 著

帝系考七

后妃

梁太祖元貞皇后張氏單州碭山人太祖少聘之生末帝太祖貴封魏國夫人天祐元年卒太祖卽位追冊爲賢妃末帝立追諡后

昭儀陳氏宋州人少以色進後專寵開平三年度爲尼昭容李氏亦以色進拜昭容後不知所終

末帝德妃張氏父歸霸事太祖爲梁功臣帝爲王時以

婦聘之帝卽位將冊德妃立爲后未及而卒
末帝次妃郭氏父登州刺史歸厚少以色進梁亡爲尼
後唐太祖正室劉氏代北人太祖爲晉王時封秦國夫
人莊宗卽位尊爲皇太妃

次妃曹氏太原人先封晉國夫人生莊宗莊宗卽位尊
爲皇太后薨葬魏縣謚貞簡

莊宗神閔敬皇后劉氏魏州安成人晉王攻魏禪將袁
建豐掠得之納之晉宮莊宗嗣位太后以賜之有寵生
子繼笈帝卽位將立后而衛國夫人韓氏正室也燕國
夫人伊氏次妃位在劉氏上故難其事宰相豆盧革樞

使郭崇韜等希旨請立劉氏爲皇后上從之乃封韓氏
爲淑妃伊氏爲德妃莊宗遇弒后出奔明宗卽位遣人
賜后死韓淑妃伊德妃皆居太原晉高祖反時爲契丹
所虜

自唐末喪亂后妃之制不備至莊宗時後宮之數尤
多有昭容昭儀昭媛出使御正傳真懿才咸一瑤芳
懿德宣等其餘名號不可勝紀明帝已後又有司寶
司贊司膳司醞司飾司衣過藥梳篋衣服知客寶省
書省弟子院使等名皆封國夫人或郡夫人少者縣

君前代內職無封君
之禮此一時之制

明宗和武憲皇后曹氏不知所出天成元年封淑妃後立爲皇后愍帝卽位尊爲皇太后

明宗昭懿皇后夏氏不知所出生秦王從榮及愍帝帝未卽位前卒天成時追冊爲皇后

明宗淑妃王氏邠州餅家子初爲梁將劉鄩侍見鄩卒帝納之卽位封爲淑妃愍帝卽位尊爲皇太妃

愍帝哀皇后孔氏父循愍帝卽位將立爲皇后未及而難作帝出奔廢帝入與所生四子皆見殺晉高祖立追諡曰哀

廢帝皇后劉氏父茂威應州渾元人初封沛國夫人帝

卽位爲皇后石敬瑭犯京師與帝俱自焚死

晉高祖皇后李氏唐明宗女初號永寧公主天福二年有司請立皇后帝以宗廟未立謙抑未遑帝崩出帝卽位乃尊爲皇太后

安太妃代北人不知其世家生出帝帝立尊爲皇太妃出帝皇后馮氏定州人父濛初適高祖弟重允重允卒出帝納之立爲皇后契丹入京師從帝北遷不知所終漢高祖皇后李氏晉陽人本農家女高祖少爲軍卒入其家劫取之高祖貴封魏國夫人生隱帝高祖卽位立爲皇后隱帝卽位爲皇太后

周太祖聖穆皇后柴氏邢州堯山人太祖少娶之太祖即位已卒追冊爲皇后

太祖淑妃楊氏鎮州真定人初爲趙王鎔妾鎔死嫁石光輔光輔卒太祖聘爲繼室天福中卒即位追冊爲妃貴妃張氏鎮州真定人初爲武氏婦武卒太祖納之太祖兵入京妃爲劉銖所殺即位追冊

德妃董氏鎮州靈壽人初爲劉進超妻進超歿太祖聘之即位冊爲德妃

世宗貞惠皇后劉氏不知所出帝微時所娶封縣君太祖舉兵留京師爲漢人所殺太祖即位封彭城郡夫人

世宗即位追冊爲皇后

宣懿皇后符氏彥卿之女初適李崇訓崇訓反誅帝納爲夫人即位立爲皇后顯德時崩

皇后符氏宣懿后之妹宣懿后崩帝納之恭帝立尊爲皇太后

宋太祖皇帝始因五代之制置司簿掌宮中簿書出納之事又置司賓並封縣君又置樂使主宮中聲伎並賜帟帔太宗置尚宮太監及知內省充內宣徽南院使兼承旨并司簿或封國夫人郡夫人又置寶省尚食封縣君又置司寶司儀司給或授郡君縣君又樂使之下增

置副使又改內省爲尚書內省令尚宮太監並號尚書
司給司簿同掌宮籍及司出給改祇候人爲御侍衣服
爲司衣梳篋爲司飾枕被爲司寢湯藥爲司藥樂使爲
仙韶使副使爲仙韶副使弟子呼供奉又置直筆書省
主事改茶器爲翰林局掌御閣爲直閣掌宮門爲直門
掌燈火爲掌燈掌從物爲直仗針線院爲裁縫院又令
司簿兼掌寶司言兼監班司儀兼承宣掌寶司儀及仙
韶使副使仍封縣君又司記知尚書內省公事而皆賜
以帟帔真宗置淑容順容婉儀婉容並從一品在昭儀
上又置貴儀在淑容之上又置司宮令正四品在尚宮

之上

太祖孝惠皇后賀氏開封人太祖正妃初封會稽郡夫
人顯德五年崩建隆三年追冊爲皇后

孝明皇后王氏邠州新平人太祖繼妃建隆元年八月
立爲皇后乾德元年崩

孝章皇后宋氏河南洛陽人乾德六年納爲皇后太宗
卽位號開寶皇后居西宮至道元年崩

太宗淑德皇后尹氏相州鄴人太宗正妃早崩太平興
國元年追冊爲皇后

懿德皇后符氏陳州宛邱人太宗繼妃帝爲晉王封越

國夫人開寶八年崩太平興國元年追冊爲皇后
元德皇后李氏真定人初爲太宗後宮封夫人生真宗
太平興國二年崩真宗卽位追尊爲皇太后
明德皇后李氏潞州上黨人太宗妃雍熙元年立爲皇
后真宗立尊爲皇太后

貴妃孫氏開封人 昭容吳氏錢塘人 尚宮李氏徐
氏 順容邵氏揚州人俱太宗後宮

朱貴妃太宗後宮爲才人後入道明道中卒

秦國夫人劉氏真宗乳母始封齊國夫人真宗卽位封
秦國延壽保聖夫人咸平元年薨帝以乳保之恩事之

如母舉哀制服

真宗莊懷皇后潘氏大名人真宗元妃端拱二年崩至
道三年追冊爲皇后

莊穆皇后郭氏太原人真宗繼妃帝繼位立爲皇后景
德四年崩

章獻明肅皇后劉氏益州人景德初爲美人進德妃莊
穆后崩立爲皇后仁宗卽位尊爲皇太后

章懿皇后李氏杭州人入宮爲司寢生仁宗進位婉儀
明道元年進宸妃薨章獻旣崩追尊爲皇太后

章惠皇后楊氏益州郫人初爲才人進婉儀仁宗在乳

祿有護視功帝卽位進皇太妃章獻崩遺誥以爲皇太后

杜貴妃真宗後宮後入道

國初立后妃皆不行冊禮大中祥符七年封婉儀楊氏爲淑妃翰林草制付中書不宣於外庭乾興元年遺制尊皇后爲皇太后淑妃爲皇太妃亦不果行冊禮自雍熙後后妃乃寫告身用金華羅紙金塗襍袋有司進入近臣牧伯皇親皆修貢禮爲賀

仁宗廢后郭氏其先應州金城人天聖中冊爲皇后立九年以後宮嬖寵忿爭坐廢出居瑤華宮號金庭教主

冲靜仙師又二年暴薨追冊爲皇后

嘉祐中帝欲置影殿於洪福寺禮官因請祔廟下兩制議未定而知制誥劉敞言春秋之義不薨於寢不赴同姓不反哭於廟則不言夫人不稱小君徒以禮不足故名號闕然則名號與禮非同物也名號存而禮不足因不正其稱况敢正其議乎郭后於三者無一焉而欲正其禮恐未安於義也傳曰不有廢也君何以興廢興之間固必有正與不正之理存焉今欲扶所廢以爲正亦將抑所興以爲不正歟古者不二嫡則萬世之後宗廟之禮豈臣子所當擅輕重哉

議者或謂郭氏之追命也既復其號不得不異其禮譬之大臣坐非辜之貶者苟明其非辜則復用之豈得不遂使爲大臣乎臣謂物有殊類而異勢未可以相準臣之與妻其義雖均然逐臣可以復歸放妻不可復合臣衆而妻一也禮官張洞言郭后之沒不得其所責當歸於朝廷死者何罪豈有始儷宸極終不廟食邪議者欲用後漢東晉故事或祭於陵寢或築宮於外稽之二史皆曰母后亦未見其合也惟唐立別廟遇禘祫則享之於義爲允敞又言郭后所以然者蓋於時聖慮在宗廟社稷之際也昔漢光武以后

郭氏怨懟廢之然當時羣臣不以光武爲情有厚薄亦不以郭氏爲不當廢者其意識遠也今陛下之慮豈不然乎光武雖廢郭氏然顧待其家不衰亦明退人以義不緣於私也此又詔書所以追復郭氏之意矣用平生之眷故尊以虛名顧禮義之正故絕其祔廟是范曄所謂使後世不見有隆薄進退之隙者也今洞之意以追復郭后則出於天子以停止廟謚則出於大臣共一詔書也而論之異同未知洞何從見之若不幸此言傳於後而且歸過君父虧損聖德此其一也臣前奏以爲廢興不兩立人君不二嫡使萬

世之後禮分不明洞不以此爲辯若不幸朝廷過聽之是雖自以能許上起廢爲功而且陰福母后妄瀆禮正此其二也故臣以謂非臣子之義忠信之道矣其後議卒不上朝廷亦未遑有所行也

按郭后正位宮闈者九年其廢也坐與後宮爭寵非如前代若霍若賈之徒有不可恕之大罪也是以當時范文正公輩力爭之以爲過舉失德旣而昭陵悔悼追復位號蓋賢於漢之景武唐之高宗元宗矣旣復位號則享祀乃禮之正而劉貢甫力爭之夫古人所謂並后二嫡者但謂不當使妾上

僭耳如后旣廢而復則固后也又已歿則不嫌其爲先后也何二嫡之有且當時曹后在位而温成以宮嬪專寵及其歿也追冊皇后置立園廟乃其失禮之尤大者貢甫不彼之正而此之泥何邪慈聖光獻皇后曹氏真定人景祐元年冊爲皇后英宗卽位尊爲皇太后

景祐元年九月立皇后曹氏冬至行冊禮與通禮異不立仗不設縣前一日守宮設次於朝堂冊寶使副次於內東門命婦次於受冊寶殿門外設皇后受冊寶位於殿庭階下北向奉禮設冊寶使位於內東門

外副使內侍位於其南差退東向北上冊寶案位於使前南向又設內給事位於北廂南向其日百官常服早入次禮官通事舍人先引中書令侍中門下侍郎中書侍郎及捧冊寶官執事人絳衣介幘詣垂拱殿門就次以俟冊降禮官通事舍人分引宰臣樞密冊寶使副百官入文德殿庭立班東西相向北上內侍二員自內承旨降冊寶率執事者捧冊寶出垂拱殿捧冊寶官俱搢笏率執事人禮官導中書侍郎押冊中書令後從門下侍郎押寶侍中後從援衛如儀由東上閣門出至文德殿庭權置禮官通事舍人引

使副就承制位次引侍中於使前西向稱有制典儀曰再拜贊者承傳使副在位官皆再拜宣曰贈尚書令冀王曹彬孫女冊爲皇后命公等持節展禮使副再拜侍中還位門下侍郎持節帥主節使詣東北主節以節授門下侍郎門下侍郎執節授冊使冊使跪受興付主節幡隨節立於使左次引中書令侍中詣冊寶東北西向立中書侍郎引冊案立於中書令之右中書令取冊授冊寶使使跪受興置於案中書令侍郎退復本班又門下侍郎引寶案於侍中之右侍中跪取寶以授冊寶使使跪受興置於案侍中門下

侍郎退復本位典儀再拜如前禮官通事舍人引使副押寶持節者前導捧冊寶官捧昇援衛以次出朝堂由右昇龍門入大慶殿門由殿西過宣祐門詣內東門內臣引內外命婦俱入就位立內侍詣閣奏請皇后首飾褱衣冊寶至內東門外位使副東向立內給事進就南向位禮官通事舍人引使就內給事前面北向跪稱冊寶使李廸副使王隨奉制授皇后冊寶訖內給事入詣受冊寶殿閣皇后前跪奏內侍進詣使前面西跪受冊寶以授內謁者監使退復位內謁者監主當內臣持冊寶入內東門內侍從之以次

入詣殿庭內侍贊引皇后降立庭中北向位內侍跪取冊又內侍跪取寶興進立於皇后之右少前西向內侍二員進立於皇后之左少前東向又內侍稱有制內侍贊皇后再拜內侍奉冊進授皇后皇后以授內侍內侍又奉寶亦然復贊再拜前導皇后升座南向內臣引內外命婦稱賀如常儀內侍進詣皇后前跪奏禮畢內侍前導皇后降座還閣內外命婦班退少頃皇后常服謝皇帝皇太后用常禮百官東上閣門拜表稱賀其冊如皇太子用珉玉五十簡標首在內匣隨冊之長寶用金方一寸五分高一寸文曰皇

后之寶盤螭紐綬并沿冊寶法物約舊制爲之匣綠
朱漆金塗銀裝 冊文曰皇帝若曰天地定位陰陽
相成人道貫之以綱大倫后德配之以熙內治聖人
有以端其本也故造舟之迎言乎備詩人有以美其
化也故周南之風著乎始粵朕冲昧祇若不構深惟
承荷之重輔佐攸艱用簡納賢明協於人神之望咨
爾贈尚書令冀王配饗太祖廟庭曹彬孫女惟乃祖
克有武功勤勞王家保勲不伐享厥終慶教流後昆
薰然慈和善祥憑積生此邦媛其漸漬醇醲發聞馨
香所從來遠矣起居祖習不待姆師之訓風容矩度

自爲宗黨之憲長秋曠位陰教未序咨求訓範統正
六列宗公鼎臣誦言於朝願卽嘉時聿申典禮朕以
春秋之義必娶大國摯疇之家乃稱福耦謀及泰筮
聘以穀圭惟吉之從有命旣集今遣使工部尚書同
平章事李廸副使戶部侍郎參知政事王隨持節冊
命爾爲皇后欽哉夫惟肅恭可以侍上夫惟謙裕可
以接下泰而能約則驕弗至動而慎思則悔弗萌懋
乃后德修乃嬪職奉承宗廟儀刑家國永綏無疆之
祚不其躋歟

皇后張氏與郭氏同入宮進美人天聖六年卒明道二

年追贈皇后

溫成皇后張氏河南永安人入宮爲才人慶歷八年進位貴妃行冊禮如后儀至和元年薨追諡爲皇后

慶歷八年制封美人張氏爲貴妃所司擇日備禮冊命學士宋祁就院寫告用官告院印封進妃擲告於地不受十二月發冊設次位命官持節授冊印內外命婦稱賀及入謝畧如冊皇后儀冊用竹簡二十四枚長尺一闊寸天下樂錦裝標金印方寸文曰貴妃之印龜紐紫綬

董淑妃仁宗後宮拜婕妤好嘉祐七年薨

美人尚氏楊氏仁宗後宮與郭氏忿爭后旣廢尚氏入洞真宮爲道士楊氏出居別宅

美人朱氏仁宗後宮

貴妃周氏仁宗後宮徽宗時薨

德妃楊氏仁宗後宮神宗時薨

賢妃馮氏仁宗後宮徽宗時薨

英宗宣仁聖烈皇后高氏亳州蒙城人英宗元妃帝卽位冊爲皇后神宗立尊爲皇太后

張修容英宗後宮初拜昌平郡君進封修容建炎四年薨於虔州

神宗欽聖憲肅皇后向氏河內人神宗元妃帝卽位冊爲皇后哲宗立尊爲皇太后

欽成皇后朱氏開封人熙寧初入宮爲才人生哲宗帝卽位尊爲皇太妃

欽慈皇后陳氏開封人入宮生徽宗封才人神宗上仙才人未幾而薨建中靖國初追冊爲皇太后

賢妃林氏神宗後宮元祐五年薨

賢妃武氏神宗後宮大觀元年薨

哲宗昭慈聖獻皇后孟氏洛州人帝卽位冊爲皇后紹聖三年坐廢居瑤華宮號華陽教主玉清妙靜仙師帝

旣崩欽聖詔后還內號元祐皇后崇寧初再廢居瑤華宮靖康時淵聖議復后位號詔未下而京城陷張邦昌僭位上尊號曰宋太后迎入宮受百官朝垂簾聽政

元祐五年八月太皇太后詔以皇帝納后有期令太常禮官檢詳古今六禮沿革參考通禮典故具其節文著爲成式者先是太皇太后諭宰臣呂大防等曰皇帝將納后天聖景祐故事止降進冊未嘗御殿禮甚簡畧大防等請退而討論遂降是詔 又詔翰林學士御史中丞兩省給舍與禮部太常寺官同詳議六年八月三省樞密院言納后六禮命使納采問名

納吉納成告期差執政官攝太尉充使侍從官或判宗正官攝宗正卿充副使以舊尚書省權爲皇后行第納采問名同日次日納吉納成告期納成加穀圭請期依開寶禮改爲告期納采前擇日告天地發冊命使差宰相攝太尉執政官攝司徒前一日告宗廟奉迎命使依開寶通禮改六禮親迎爲命使奉迎差宰臣攝太尉執政官攝司徒皇帝臨軒與冊禮使副同日遣先遣冊禮使次遣奉迎使令文武百官詣行第班迎其日皇后服禕衣乘重翟車鹵簿依禮令由宣德門東偏門入文臣大卿監武臣正任刺史以上

宣德門外班迎詔從之初議以都亭驛爲皇后行第給事中范祖禹言都亭驛常爲遼使館舍今納皇后以母天下而使居夷狄之館非所以觀示四方爲正始之道也請以舊尚書省爲行第從之祖禹又言臨軒發冊命使奉迎及皇后入內皇帝皆服通天冠絳紗袍於禮未隆請並服袞冕以重大昏之禮翰林學士范百祿言昏禮下達匪媒不克今采擇先定有命旣集而形於麻制以后氏族姓宣告外廷方且遣使齋制行納采問名之禮則禮文顛倒失先後之序請以降詔之日行納采問名之禮宣制之日行納吉納

成告期之禮皆不從既而禮部太常寺言五禮命使據開元納采問名合用一使其納吉納成告期各別日遣使今未委三禮共遣一使或各遣使文武百官詣行第班迎文臣大卿監武臣正任刺史以上宣德門外班迎緣至日行第門外已設皇后車乘儀仗逼隘不容百官車馬其文武百官欲並於宣德門外立班奉迎按士皆禮用鴈所以爲贄也又按曲禮凡贄天子鬯鄭康成謂天子無客禮以鬯爲贄者惟用告神今已據周禮用穀圭聘后欲更不用鴈文德殿發制欲依發冊例立仗或止用月朔視朝仗百官朝服

制書登車訖欲出宣德正門使副步從至外上車使者復命欲入左掖門於門外下車指內東門付內侍進入制版匣欲倣穀圭匣製造使副受制書奉出朝堂門外置制書於車內緣右昇龍門臺不通車乘過往今參詳置制書車合入宣德門東偏門至右昇龍門外候使副奉出制書卽置車內詔納吉納成告期令各遣使文德殿發制依發冊例立仗餘並從之

七年正月詔尚書左丞蘇頌撰皇后冊文兼書二月學士院上六禮辭語納采制文太皇太后日咨某官封姓名渾元資始肇經人倫爰及夫婦以奉天地宗

廟社稷謀於公卿咸以爲宜率由舊典今遣使持節
太尉某宗正卿某以禮納采答文曰太皇太后嘉命
訪昏陋族備數采擇臣之女姑姊妹卽云先臣某官
之遺女未閑教訓衣履若而人欽承舊章肅奉典制
某官封糞土臣姓某稽首再拜承制詔問名制文太
皇太后曰咨某官封姓名兩儀合德萬物之統以聽
內治必咨令族重宣舊典今遣使持節太尉封某宗
正卿封某以禮問名答文曰太皇太后嘉命使者重
宣中制問臣名族臣女夫婦所生先臣故某官之遺
微孫先臣故某官之遺曾孫先臣故某官之遺孫先

臣故某官之外孫女年若干欽承舊章肅奉典制某
官糞土臣某稽首頓首再拜承制詔若女祖已上在
直云某官臣之孫女納吉制文太皇太后曰咨某官
封姓名人謀龜從同符元吉恭順典禮今遣使持節
太尉封臣某宗正卿封臣某以禮納吉答文曰太皇
太后嘉命使者某重宣中制臣陋族卑鄙憂懼不堪
欽承舊章肅奉典制某官糞土臣姓名稽首頓首再
拜承制詔納成制文太皇太后曰咨某官姓名之女
孝友恭儉實維母儀宜奉宗廟永承天祚以勳纁縠
圭六馬以章典禮今遣使持節太尉封某宗正卿封

某以禮納成答文曰太皇太后嘉命使者某重宣中制降婚卑陋崇以上公寵以豐禮備物典冊欽承舊章肅奉典制某官糞土臣姓名稽首頓首再拜承制詔告期制文太皇太后曰咨某官姓名謀於公卿大筮元龜罔有不臧吉日維某月某甲子可迎率遵典禮今使使持節太尉封某宗正卿封某以禮告期答文曰太皇太后嘉命使者某重宣中制以某月某甲子吉日告期臣欽承舊章肅奉典制某官糞土臣姓名稽首頓首再拜承制詔命使奉迎制文太皇太后曰咨某官姓名禮之大體欽順重正其期維吉典圖

是若今遣使持節太尉封某宗正卿封某以禮奉迎答文曰太皇太后嘉命使者某重宣中詔今日吉辰備禮以迎螻蟻之族猥承大禮憂懼戰悸欽承舊章肅奉典制某官糞土臣姓名稽首頓首再拜承制詔按晉穆帝永和十年臺符問六禮版文舊稱皇帝今太后臨朝當何稱博士曹耽云公羊傳婚禮不稱主人母諸父爲主太常王彪之云三傳異議不可全據今太皇太后臨朝稱制文告所達國之大典皆仰稟成非無外事也豈婚聘獨不通乎六禮版文應稱皇太后今請遵彪之議詔並從之 三月禮部太常寺

上納后儀注發六禮制書日太皇太后御崇慶殿坐命內外命婦立班行禮畢內給事出殿門置六禮制書案上出內東門禮直官通事舍人引由宣祐門至文德殿後門入權置案於東上閣門命使納采問名文德殿宰臣親王執政官宮室文武百僚大小使臣軍員蕃官易朝服樂備而不作立班定內給事奉制書案置於橫街北稍東西向北上禮直官通事舍人引門下中書侍郎次引使副就橫街南承制位北向東上內給事詣使者東北立稱太皇太后有制典儀曰再拜在位官皆再拜宣制曰皇帝納后命公等持

節行禮宣訖典儀曰再拜使副皆再拜授制書訖典儀曰再拜在位官皆再拜禮直官通事舍人太常博士引使副從制案出由端禮門入右昇龍門安於油絡網犢車內出宣德門鼓吹備而不作至皇后行第大門外令史二人對捧制案立主人於大門內僮者立於主人之左北面進受命出曰敢請事使者曰某奉制納采僮者入告主人曰某之女若而人旣蒙制訪臣某不敢辭僮者出告入引主人出於大門外再拜使者先入使者曰太皇太后有制主人再拜宣制書畢主人再拜受訖主人進表訖再拜使者出問名

同上儀使者曰將加卜筮奉制問名主人曰臣某之女若而人旣蒙制問臣不敢辭命使納吉納成告期並同命使納采問名儀納吉使者曰加請卜筮占曰從制使某納吉主人曰臣某之女若而人龜筮云吉臣預有焉臣某謹奉典制告期使者曰某奉制告期主人曰臣某謹奉典制以上納吉納成告期請見受制接表並如納采儀臨軒命使冊后及奉迎文德殿宰臣親王執政官宗室文武百僚朝堂易朝服皇帝常服乘輦至文德殿後閣待中奏中嚴次外辦皇帝服通天冠絳紗袍出閣乘輦皇帝出自西房降輦卽

御座分引兩省官及待制權侍郎觀察使以上分東西入殿門各就位東西相向立奉寶置於御座前奉宣后冊出閣由東上閣門出至文德殿庭橫行典儀贊曰拜在位官皆再拜使副授冊宣制曰冊某氏爲皇后命公等持節展禮宣訖典儀曰再拜使副皆再拜使副受冊寶訖典儀曰再拜在位官皆再拜宣制曰太皇太后制命公等持節奉迎皇后宣訖典儀曰再拜使及副皆再拜受節典儀曰再拜在位羣官皆再拜出殿門侍中奏禮畢皇帝陞座入自東房入閣侍中奏解嚴承旨放仗百僚再拜出皇帝常服還內

冊寶出文德殿門端禮門入右昇龍門出宣德正門
赴行第冊后如納采儀使者曰某奉制授皇后備物
典冊皇后受冊寶內外命婦序立如儀主人以書奉
使者奉迎宰臣親王使相執政官文武百僚宗室等
常服班迎於宣德門外行第儂者請使者曰某奉制
以禮奉迎儂者入告主人曰臣某謹奉典制儂者出
告入引主人出大門外再拜使者先入曰有制主人
再拜使者宣制畢主人再拜主人受制訖主人答表
再拜姆導皇后尚宅前引外堂出立房外典儀曰再
拜使副俱再拜使者曰令月吉日某等承制以禮奉

迎內侍受以人使副退主人以書授使者奉於司言
受以奏聞皇后降立堂下再拜訖升堂主人升降階
進西向戒之曰戒之戒之夙夜無違命訖主人退母
進西階上東向施衿結帨戒之曰勉之戒之夙夜無
違命訖連進皇后升輿至中門皇后降輿升車內皇
后出大門使副及羣臣前引從皇后將到宣德門有
司宰臣文武百僚宗室南向班迎再拜訖分班皇后
入宣德門鳴鐘鼓班迎官退皇后降車入次外輿出
右昇龍門入端禮門文德殿東上閤門出文德殿後
門入宣祐門至內東門內降輿司輿前導皇后詣福

寧殿門大次以俟至日晡後皇后車入宣德門禮直
官通事舍人引侍中版奏請中嚴內侍轉奏皇帝服
通天冠絳紗袍御福寧殿宮人侍衛如常儀尚宮引
皇后出次詣殿庭之東西南立尚儀跪奏外辦請皇
帝降座禮迎尚宮前引詣庭中之西東面揖皇后以
入皇帝導皇后外自西階入室各就榻前立尚食跪
奏具皇帝揖后皆坐尚食以饌進皇帝及后皆食三
飯尚食以酒進皇帝皇后俱受爵飲尚食以饌進再
飲如初三飲用悉如再飲尚儀跪奏禮畢皇帝皇后
俱興尚宮請皇帝御常服常寢請皇后釋禮服入幄

次日以禮朝見太皇太后皇太后參皇太妃如宮中
之儀詔從之

昭德皇后劉氏初入宮爲婕妤好昭慈旣廢立爲皇后徽
宗立冊爲元符皇后

朱夫人開封人治平間自襁褓入宮建炎四年從隆祐
太后幸江西還封嘉國夫人主管大內公事知尚書內
省提舉十閣分紹興二年卒

張夫人久在宮掖嘗教哲宗道君讀書建炎時卒

慕容貴妃哲宗後宮初爲侍御紹興初累進至婕妤二
十二年薨

靖康之難六宮皆北去惟隆祐太后以廢處瑤華及先朝嬪御得留其姓氏封爵可見者如前

徽宗顯恭皇后王氏開封人徽宗元妃卽位冊爲皇后生欽宗大觀二年崩

顯肅皇后鄭氏開封人入宮累進至貴妃顯恭崩冊爲皇后淵聖受禪尊爲太上皇后

明達皇后劉氏入宮爲才人七遷至貴妃政和三年薨追冊爲皇后

明節皇后劉氏入宮爲才人進至淑妃宣和三年薨追冊爲皇后

顯仁太后韋氏開封人入宮自侍御累遷至婉容生高宗從上皇北狩高宗卽位遙尊爲宣和皇后紹興十二年歸自虜中

貴妃王氏徽宗後宮政和七年薨

貴妃崔氏徽宗後宮宣和時坐罪廢

貴妃喬氏徽宗後宮從北狩歿於虜境

欽宗仁懷皇后朱氏開封人初爲皇太子妃上受禪立爲皇后從北狩歿於虜境慶元三年遙上尊號諡祔於太廟欽宗室

高宗憲節皇后邢氏開封祥符人帝在康邸封夫人從

二帝北狩帝卽位遙冊爲皇后紹興九年崩於五國城
虜祕之上虛中宮以待者十六年顯仁回始得凶問梓
宮至祔神主於別廟淳熙末合祔高宗於太廟

憲聖慈烈太后吳氏開封人上在維揚納之累進婉儀
憲節皇后崩問至紹興十三年立爲皇后孝宗卽位尊
爲太上皇后

賢妃潘氏開封人高宗在康邸納之旣卽位生元懿太
子進位賢妃紹興十八年薨

張賢妃開封人建炎初爲才人進婕妤好上令母養孝宗
十二年薨

劉貴妃臨安人入宮累封至貴妃淳熙十四年薨

劉婉儀初爲宜春郡夫人累遷至婉儀紹興末以罪廢

張貴妃開封祥符人累封至婉容淳熙七年進封太上

皇帝淑妃再進貴妃紹熙元年薨

馮美人韓氏吳氏李氏王氏四才人紹興中俱寵幸後
皆廢

容齋洪氏隨筆曰內庭婦職遷敘皆出中旨至中
書命詞如尙書內省官固知其爲長年習事如司
字典字掌字知其爲主守之微者至於紅紫霞帔
郡國夫人則其年齡之長少爵列之崇卑無由可

以測度紹興二十八年九月仲兄以左史直前奏事時兼權中書舍人高宗聖訓云有一事待與卿說昨有宮人宮正者封夫人乃宮中管事人六十餘歲非是嬪御恐卿不知兄奏云係王剛中行詞剛中除蜀帥係臣書黃容別撰入上領首後四日經筵留身奏事奏言前日面蒙宣諭永嘉郡張夫人告詞既得聖旨令不須別撰上曰乃皇后閣中老管事人今六十六歲宮正乃執事者昨日宰執奏欲換告亦無妨礙不須別進今已年老多病但欲得稱呼耳蓋昨訓詞中稱其容色云

成穆皇后郭氏開封祥符人孝宗正妃初封咸寧郡夫人紹興二十六年薨上卽位追冊爲皇后

成恭皇后夏氏江西人上爲普安郡王入宮上卽位進賢妃踰年立爲皇后乾道三年崩

成肅皇后謝氏丹陽人上爲普安郡王時入宮上卽位累遷至貴妃夏后崩中宮虛位將十載淳熙三年立爲皇后光宗受禪尊爲壽成皇后

蔡貴妃孝宗後宮淳熙十二年薨

李賢妃孝宗後宮淳熙十年薨

慈懿皇后李氏安陽人光宗元妃生寧宗帝正位東宮

立爲皇太子妃受禪立爲皇后寧宗立稱太上皇后
黃貴妃張貴妃武才人並光宗後宮又有潘夫人符夫
人二張夫人並上郡封無品程凡宮中之制郡夫人以
上始稱房院

恭淑皇后韓氏其先相州人寧宗元妃上卽位立爲皇
后慶元六年崩

壽明皇后楊氏遂安人入宮累封貴妃恭淑旣崩以嘉
泰三年立爲皇后理宗卽位尊爲皇太后

文獻通考卷第二百五十六



